

उववाई सूत्तं

१२५ R

१८०७

प्रकाशक



पं० छोटेलाल यति
रांगड़ी चौक बीकानेर

शीघ्रता कीजिये ? अपूर्व अवसर ?? हाथ से न जाय ???

पूज्य श्री १८०८ श्री जवाहिरलालजी महाराज के व्याख्यानों
द्वारा जो पुस्तकें निकलती हैं :—

उनके पढ़ने से देश, जाति, नीति और जैन धर्म के गूढ़ रहस्या के साथ-साथ
परोपकार वृत्ति का प्रसार होता है तथा जैसे-जैसे इन दैवी गुणों की
सत्ता बढ़ती जायगी वैसे वैसे संसार की पीड़ारूप आसुरी
भावों का मूलोच्छेद होता जायगा ।

यदि आप ऐसे २ अनेक ग्रंथों को पढ़ना चाहते हों तो आज ही जीवन
कार्यालय अजमेर के स्थायी ग्राहक बनकर एक रुपया और ज्यादा
जमा कर देंगे तो आपको यह पुस्तकें बुक पोस्ट द्वारा बराबर मिल जायंगी
और इससे खर्च की भी बचत होगी तथा समय पर पुस्तकें भी मिलेगी
रुपया पूरा होने पर हिसाब भेज दिया जायगा ।

आज तक दयादान सम्बन्धी अपूर्व तर्क वितर्कों से परिपूर्ण
ऐसी पुस्तकें जैन समाज में प्रकाशित नहीं हुई हैं

तेरापंथ समाज ने इन पुस्तकों को बीकानेर गवर्नमेंट से ज्वन कराने के
लिये दो दो बार तन, मन, धन, से महान प्रयत्न किया किन्तु दया-धर्म
प्रेमी सरकार ने दया-धर्म के सिद्धान्तों की पूर्ण रक्षा की है ।



“सद्धर्म मंडन” (१२०० पृष्ठ के अंदाज का ग्रंथ रु० १) में ।

‘चित्रमय अनुकम्पा चिन्तार’ (जिसमें दयादान सम्बन्धी २०
चित्र रहेंगे) इसका मूल्य आठ आने ।

यह पुस्तकें छपने से पहिले ही इस मूल्य में मिल सकेंगी बाद में
नहीं दी जायगी इसलिये अभी से अपना और अपने
मित्रों का नाम ग्राहकों की श्रेणी में लिखा दें ।

जीवन ग्रन्थमाला का १६ वाँ पुष्प

उक्काई सूत्र मूल पाठ



मूल्य

सन १९३६

चार आना

प्रथमावृत्ति
६००

बेटिलाय यति
जीवन कार्यालय अजमेर



मुद्रक
त्रिभुवन लक्ष्मण
आदर्श प्रेस, अजमेर १५५-५-३६
संचालक-त्रिभुवन लक्ष्मण

उक्वाई सूक्तं (पटमोपांगं)



(सूत्र१) तेणं कालेणं तेणं समएणं चंपा नामनयरी
होत्था, रिद्धत्थिमियसमिद्धा पमुइयजणजाणवया
आइएणजणमणूसा हलसयसहसससंकिट्टविकिट्टलट्ट
पएणत्तसेउसीमा कुक्कुडसंडेयगामपउरा उच्छुजव-
सालिकलिया गोमहिसगवेलगप्पभूया आयारवंत-
चेइयजुवइविविहसणिणविट्टबहुला उक्कोडियगायगं-
ठिमेयगभडतक्करखंडरक्खरहिया खेमा णिरुवइवा
सुभिकखा वीसत्थसुहावासा अणेगकोडिकुडुंवि-
याइएणणिव्वुयसुहा णडणट्टगजल्लमल्लमुट्ठियवेलंबग-
कहगपवगलासगआइक्खगलंखमंखत्तूणइ ल्लतुंबवी-
णियअणेगतालायराणुचरिया आरामुज्जाणअगडत-
लागदीहियवप्पिणिगुणोववेया नंदणवणसन्निभप्प-
गासा उव्विद्धविउलगंभीरखायफलिहा चक्कगयमु-
सुंढिओरोहसयग्घिजमलकवाडघणदुप्पवेसा धणुकु-
डिलवंकपागारपरिक्खित्ता कविसीसयवट्टरइयसं-
ठियविरायमाणा अट्टालयचरियदारगोपुरतोरण-
उएणयसुविभत्तरायमग्गा छेयायरियरइयदढफलिह-

इंदकीला विवणिवणिछेयसिप्पियाइणणिब्बुयसुहा
 सिंघाडगतिगचउक्कचचरणियावणविवहवत्थुपरि-
 मंडिया सुरम्मा नरवइपविइणमहिहवइपहा अणे-
 गवरतुरगमत्तकुंजररहपहकरसीयसंदमाणीआइण-
 जाणजुग्गा विमउलणवणलिणिसोभियजला पंडुर-
 वरभवणसण्णिमहिया उत्ताणणयणपेच्छणिज्जा
 पासादीया दरिसणिज्जा अभिरूवा पडिरूवा ॥

सू० (२) तीसे णं चंपाए णयरीए बहिया
 उत्तरपुरत्थिमे दिसिभाए पुण्णभदे णामं चेइए होत्था,
 चिराईए पुब्बपुरिसपण्णत्ते पोराणे सहिए वित्तिए
 कित्तिए णाए सच्छत्ते सज्झए सघण्ठे सपडागे
 पडागाइपडागमंडिए सलोमहत्थे कयवेयहिए लाउ-
 ल्लोइयमहिए गोसीससरसरत्तचंदणदहरदिणपंचंगु-
 लितले उवचियचंदणकलसे चंदणघडसुकयतोरण-
 पडिदुवारदेसभाए आसत्तोसत्तविउलवट्टवग्घारिय-
 मल्लदामकलावे पंचवरुणसारससुरहिमुक्कपुप्फपुंजो-
 वयारकलिए कालागुरुपवरकुंदुरुक्कतुरुक्कधूवमघमघं-
 तगंधुधूयाभिरामे सुगंधवरगंधगंधिए गंधवट्ठिभूए
 णडणहगजल्लमल्लमुट्ठियवेलंबयपवगकहगलासग आ-
 इक्खगलंखमंखतूणइल्लतुंबवीणियभुयगमागहपरिग
 एवहुजणजाणवयस्स विस्सुयकित्तिए बहुजणस्स

आहुस्स आहुणिज्जे पाहुणिज्जे अरुचणिज्जे बंद-
णिज्जे नमंसणिज्जे पूयणिज्जे सक्कारणिज्जे सम्मा-
णाणिज्जे कल्लाणं भंगलं देवयं चेइयं विणएणं पज्जु-
वासणिज्जे दिव्वे सच्चवे सच्चवोवाए सणिहियपा-
डिहेरे जागसहस्सभागपडिच्छए बहुजणो अच्चेइ
आगम्म पुण्णभदं चेइयं पुण्णभदं चेइयं ॥

(सू० ३) से णं पुण्णभदे चेइए एक्केणं महया
वणसंहेणं सव्वओ समंता संपरिक्खित्ते, से णं
वणसंडे किएहे किएहोभासे नीले नीलोभासे हरिए
हरिओभासे सीए सीओभासे णिद्धे णिद्धोभासे
तिव्वे तिव्वोभासे किएहे किएहच्छाए नीले नील-
च्छाए हरिए हरियच्छाए सीए सीयच्छाए णिद्धे
णिद्धच्छाए तिव्वे तिव्वच्छाए घणकडिअकडि-
च्छाए रम्मे महामेहणिकुरंबभूए ।

ते णं पायवा मूलमंतो कंदमंतो खंधमंतो
तयामंतो सालमंतो पवालमंतो पत्तमंतो पुप्फमंतो
फलमंतो बीयमंतो अणुपुव्वसुजायरुहलवट्टभाव-
परिणया एक्खंधा अणेगसाला अणेगसाहप्पसाह-
विडिमा अणेगनरवामसुप्पसारिय अग्गेज्झघणवि-
उलवट्टखंधा अच्छिदपत्ता अविरलपत्ता अवाईण-
पत्ता अणईअपत्ता [] निद्धूयजरट्ठपंडुपत्ता एवह-

रियभिसंतपत्तभारं धयारगं भीरदरिसणिज्जा उवणि-
 र्गयणवतरुणपत्तपल्लवकोमलउज्जलचलंतकिसलय-
 सुकुमालपवालसोहियवरं कुरग्गसिहरा णिच्चं कुसु-
 मिया णिच्चं माइया णिच्चं लवइया णिच्चं थव-
 इया णिच्चं गुलइया णिच्चं गोच्छिइया णिच्चं जम-
 लिया णिच्चं जुवलिया णिच्चं विणमिया णिच्चं
 पणमिया णिच्चं कुसुमियमाइयलवइयथवइयगुलइय-
 गोच्छिइयजमलियजुवलियविणमियपणमियसुविभ-
 त्तपिंडभंजरिवडिंसयधरा सुयवरहिणमयणसालको-
 इल बोहंगकभिंगारगकोंडलगजीवंजीवगणंदीमुहक-
 विलपिंगलक्खगकारंडचक्कवायकलहंसरारसअणे-
 गसउणगणमिहुणविरइयसद्दुणइयमहुरसरणाइए
 सुरम्मे संपिंडियदरियभमरमहुयरिपहकरपरिलिन्तम-
 त्तद्धप्पयकुसुमासवलोलमहुरगुमगुमंतगुंजंतदेसभागे
 अडिंभतरपुप्फफले बाहिरपत्तोच्छरणे पतेहि य
 पुप्फेहि य उच्छरणपडिवलिच्छरणे साउफले निरो-
 यए अकंटए णाणाविहगेच्छगुम्ममंडवगरम्मसोहिए
 विचित्तसुहकेउभूए वावीपुक्खरिणीदीहियासु य
 सुनिवेसिय रम्मजालहरए, पिंडिमणीहारिमसुगंधि
 सुहसुरभिमणहरं च महया गंधद्वणिं मुयंता
 णाणाविहगुच्छगुम्ममंडवगघरगसुहसेउकेउबहुला

अणेरगरहजाणजुगसिवियपविमोयणा सुरम्मा पा-
सादीया दरिसणिज्जा अभिरूवा पडिरूवा ॥

(सू० ४) तस्स णं वणसंडस्स बहुमज्झदेस-
भाए एत्थ णं महं एक्के असोगवरपायवे, पणत्ते
[] कुसविकुसविसुद्धरुक्खमूले मूलमंते कंदमंते
जाव परिमोयणे सुरम्मे पासादीए दरिसणिज्जे
अभिरूवे पडिरूवे ।

से णं असोगवरपायवे अण्णेहिं बहूहिं तिल-
एहिं लउएहिं छत्तोवेहिं सिरीसेहिं सत्तवण्णेहिं
दहिवरण्णेहिं लोद्धेहिं धवेहिं चंदणेहिं अज्जुणेहिं
णीवेहिं कुडएहिं कलंबेहिं सव्वेहिं फणसेहिं दाडि-
मेहिं सालेहिं तालेहिं तमालेहिं पियएहिं पियंगूहिं
पुरोवगेहिं रायरुक्खेहिं णंदिरुक्खेहिं सव्वओ
समंता संपरिक्खित्ते ।

ते णं तिलया लवइया जाव णंदिरुक्खा कुस-
विकुसविसुद्धरुक्खमूला मूलमंतो कंदमंतो एएसिं
वणओ भाणियवओ जाव सिवियपरिमोयणा सुर-
म्मा पासादीया दरिसणिज्जा अभिरूवा पडिरूवा ।

ते णं तिलया जाव णंदिरुक्खा अण्णेहिं बहूहिं
पउमलेयाहिं णागलेयाहिं असोअलेयाहिं चंपगल-
याहिं चूयलेयाहिं वणलेयाहिं वासंतियलेयाहिं

अइमुत्तयलयाहिं कुंदलयाहिं सामलयाहिं सब्वओ
समंता संपरिखित्ता ।

ताओ णं पउमलयाओ णिच्चं कुसुमियाओ
जाव वडिंसयधरीओ पासादीयाओ दरिसणिज्जाओ
अभिरूवाओ पडिरूवाओ ॥

(सू० ५) तस्स णं असोगवरपायवस्स हेट्ठा
ईसिं खंधसमल्लीणे एत्थ णं महं एक्केपुढविसिलापट्टए
पणत्ते, विक्खंभायामउस्सेहसुप्पमाणे किरहे
अंजणघणकिवाणकुवलयहलधरकोसेज्जागासके
सकज्जलंगीखंजणसिंगभेदरिद्वयजंबूफलअसणसक-
णबंधणणीलुप्पलपत्तनिकरअयसिकुसुमप्पगासे मर-
गयमसारकलित्तणयणकीयरासिवरणे णिद्वघणे
अट्टसिरे आयंसयतलोवमे सुरम्मे ईहामियउसभतु-
रगनरमगरविहगवालगकिरणररुसरभचमरकुंजर
वणलयपउमलयभत्तिचित्ते आईणगरूयबूरणवणीय
तूलफरिसैसीहा सणसंठिए पासादीए दरिसणिज्जे
अभिरूवेपाडिरूवे ॥

(सू० ६) तत्थ णं चंपाए णयरीए कूणिए णामं
राया परिवसइ, महयाहिमवंतमहंतमलयमंदरमहिं-
दसारे अच्चंतविसुद्धदीहरायकुलवंससुप्पसूए णिरं-
तरं रायलक्खणविराहयंगमंगे बहुजणबहुमाणपूइए

सव्वगुणसमिद्धे खत्तिए मुइए मुद्धाहिसित्ते माउपि-
उसुजाए दयपत्ते सीमंकरे सीमंधरे खेमंकरे खेमंधरे
मणुस्सिंदे जणवयपिया जणवयपाले जणवयपुरोहिए
सेउकरे केउकरे णरपवरे पुरिसवरे पुरिससीहे पुरि-
सवग्गे पुरिसासीविसे पुरिसपुंडरीए पुरिसव
गंधहत्थी अड्ढेदित्ते वित्ते विच्छिण्णविउलभवण-
सयणामणजाणवाहणाइण्णे बहुधणबहुजायरुवरय
एआओगपओगसंपउत्ते विच्छिड्डियपउरभत्तपाणे
बहुदासीदासगोमहिसगवेलगप्पभूए पडिपुण्णजंत
कोसकोट्टागाराउधागारे बलवं दुब्बलपच्चामित्ते
ओहयकंटयं निहयकंटयं मलियकंटयं उद्धियकंटयं
अकंटयं ओहयसत्तुं निहयसत्तुं मलियसत्तुं
उद्धियसत्तुं निज्जियसत्तुं पराइयसत्तुं ववगय-
दुब्भिकखं मारिभयविप्पमुक्कं खेमं सिवं सुभिकखं
पसंतडिंवडमरं रज्जं पसासेमाणे बिहरइ ॥

(सू० ७) तस्स णं कोणियस्स रण्णो धारिणी
णामं देवी होत्था, सुकुमालपाणिपाया अहीणपडि-
पुण्णपंचिंदियसरीरा लक्खणवंजणगुणोववेयामाणु-
म्माणप्पमाणपडिपुण्णसुजायसव्वंगसुंदरगी ससि-
सोमाकारकंतपियदंमणा सुरुब्बा करयलपरिमियपस-
त्थतिवलीवलियमज्झा कुंडलुल्लिहियगंडलेहा कोमु-

इयरयणियरविमलपडिपुणसोमवयणा सिंगारागार-
 चारुवेसा संगयगयहसियभणियविहियविलाससल-
 लियसंलावणिउणजुत्तोवयारकुसला [सुन्दरथणज-
 घणवयणकरचरणनयणलावणविलासकलिया] पा-
 सादीया दरिसणिज्जा अभिरूवा पडिरूवा, कोणि-
 एणंरणा-भंमसारपुत्तेणं सद्धिंअणुरत्ता अविरत्ता
 इट्ठे सहफरिसरसरूवगंधे पंचविहे माणुस्सए काम-
 भोए पच्चणुभवमाणी विहरइ ॥

(सू० ८) तस्स णं कोणियस्स रणो एक्के पुरिसे
 बिउलकयवित्तिए भगवओ पवित्तिवाउए भगवओ
 तद्देवसियं पवित्तिं णिवेदेइ ।

तस्स णं पुरिसस्स बह्वे अण्णे पुरिसा दिण-
 भतिभत्तवेअणा भगवओ पवित्तिवाउया भगवओ
 तद्देवसियं पवित्तिं णिवेदेति ॥

(सू० ९) तेणं कालेणं तेणं समएणं कोणिएराया
 भंमसारपुत्ते बाहिरियाए उवट्ठाणसालाए अणेगग-
 णणायगदंडणायगराईसरतलवरमाडंबियकोडुंबियमं-
 तिमहामंतिगणगदोवारियअमच्चचेडपीढमहनगरनि-
 गमसेट्ठिसैणावइसत्थवाहदूयसंधिवालसद्धिं संपरि-
 बुडे बिदहरइ ॥

(सू० १०) तेणं कालेणं तेणं समएणं समणे
 भगवं महावीरे आइगरे तित्थगरे सहसंबुद्धे पुरि-
 सुत्तमे पुरिससीहे पुरिसवरपगुंडरीए पुरिसवरगंध-
 हत्थी अभयदए चक्रबुदए मग्गदए सरणदए जीव-
 दए दीवो ताणं सरणं गई पइट्ठा धम्मवरचाउरंत-
 चक्खवट्ठी अप्पडिहयवरनाणदंसणधरे वियट्ठच्छउमे
 जिणे जाणए तिण्णे तारए मुत्ते मोयए बुद्धे बोहए
 सव्वएणू सव्वदरिसी सिवमयलमरुयमणंतमक्खय-
 मव्वाबाहमपुणरावत्तिथं सिद्धिगइणामधेयं ठाणं
 संपाविउकामे अरहा जिणे केवली सत्तहत्थुस्सेहे
 समचउरंसंठाणसंठिए वज्जरिसहनारायसंधयणे
 अणुलोमवाउवेगे कंकगहणी कवोयपरिणामे सउ-
 णिपोसपिट्ठंतरोरुपरिणए पउमुप्पलगंधसरिसनि-
 स्साससुरभिवयणे छवी निरायंकउत्तमपसत्थअइ-
 सेयनिरुवमपले जल्लमल्लकलंकसेयरयदोसवज्जियस-
 रीरनिरुवलेवे छायाउज्जोइयंगमंगे घणगिचियसुबद्ध-
 लक्खणुणयकूडागारनिभर्पिडियग्गसिरए साम-
 लिबोडघणनिचियच्छोडियमिउविसयपसत्थसुहुम-
 लक्खणसुगंधसुंदर सुयमोयगभिगनेलकज्जलपहिट्ठ-
 भमरगणणिट्ठनिकुरुंबनिचियकुंचियपयाहिणा वत्त-
 मुद्धसिरए दालिमपुप्फुप्पगासतवणिज्जसरिसनिम्म-

लसुणिद्वकेसंतकेसभूमी घण (निचिय) [] छत्तागारुत्त-
 मंगदेसे णिब्बणसमलट्टमट्टचंदद्वसमणिडाले उडुवइ-
 पडिपुण्णसोमवयणे अल्लीणपमाणजुत्तसवणे सुस्स-
 वणे पीणमंसलकवोलदेसभाए आणामियचावरुइल-
 किएहब्भराइतणुकसिणणिद्वभमुहे अवदालियपुंड-
 रीयणयणे कोयासियधवलपत्त तच्छे गरुलायतउज्जु-
 तुंगणासे उवचियसिलप्पवालबिंबफलसरिणभाह-
 रोट्टे पंडुर ससिसयलविमलणिम्मलसंखगोम्भीर-
 फेणकुंददगरयमुणालियाधवलदंतसेढी अखंडदंते
 अप्फुडियदंते अविरलदंते सुणिद्वदंते सुजायदंते
 एगदंतसेढी विव अणेगदंते हुयवहणिद्वतंधोयत-
 त्ततवणिज्जरत्ततलतालुजीहे अवट्टियसुविभत्तचि-
 त्तमंसू मंसलसंठियपसत्थसद्दूलविउलहणुए चउरं-
 गुलसुप्पमाणकंबुवरसरिसग्गीवे वरमहिसवराहसो-
 हसद्दूलउसभनागवरपडिपुण्णविउलक्खंधे जुगस-
 न्निभपीणरइयपीवरपउट्टसुसंठियसुसिलिद्विसिद्व-
 घणथिरसुबद्धसंधिपुरवरफलिहवट्टियमुए भुयईस-
 रविउलभोगआयाणपलिहउच्छूढदीहबाहू रत्ततलो-
 वइयमउयमंसलसुजायलक्खणपसत्थअच्छिद्वजाल-
 पाणी पीवरकोमलवरंगुली आयंबतंबतलिणसुइरुइ-
 लणिद्वणक्खे चंदपाणिलेहे सूरपाणि लेहे संखपाणि-

लेहे चक्कपाणिलेहे दिसासोत्थियपाणिलेहे चंदसूर-
संखचक्कदिसासोत्थियपाणिलेहे कणगसिलायलुज्ज-
लपसत्थसमतलउवचियविच्छिणपिहुलवच्छे सि-
रिवच्छंक्कियवच्छे अकरंडुयकणगरुययनिम्मलसु-
जायनिरुवहयदेहधारी अट्टसहस्सपडिपुणवरपुरि-
सलक्खणधरे सणयपासे संगयपासे सुंदरपासे
सुजायपासे मियमाइयपीणरइयपासे उज्जुयसमस-
हियजच्चतणुकसिणणिद्धआइज्जलडहरमणिज्जरो-
मराई भसविहगसुजायपीणकुच्छी भसोयरे सुइ-
करणे पउमवियडणाभे गंगावत्तगपयाहिणावत्तरं-
गभंगुररविकिरणतरुणबोहियअकोसायंतपउमगंभी-
रवियडणाभे साहयसोणंदमुसलदप्पणणिकरियवर-
कणगच्छरुसरिसवरवइरवलियमज्जे पमुइयवरतुर-
गसीहवरवट्टियकडी वरतुरगसुजायसुगुज्जभदेसे
आइएणंहउव्व निरुवलेवे वरवारणतुल्लविक्कमथिल-
सियगई गयससणसुजायसन्निभोरु समुग्गणिम-
ग्गगूढजाणू एणीकुरुविंदावत्तवट्ठाणुपुव्वजंघे संठिय-
सुसिलिंठ विसिंठ गूढगुप्फे सुप्पइट्टियकुम्भचारु-
चलणे अणुपुव्वसुसंहयंगुलीए उणयतणुतंबणिद्ध
णक्खे रत्तुप्पलपत्तमउयसुकुमालकोमलतले अट्टसह-
स्सवरपुरिसलक्खणधरे नगनगरमगरसागरचक्कंकरं-

गमंगलंकियचलणे विसिद्धरूवे हुयवहनिधूमजलि-
 यतडितडियतरुणरविकिरणसरिसतेए अणासवे
 अममे अकिंचणे छिन्नसोए निरुवलेवे ववगयपेमरा-
 गदोसमोहे निग्गंथस्स पवयणस्स देसए सत्थनायगे
 पइट्ठावए समणगपई समणगविंदपरिअट्ठए चउत्ती-
 सबुध्दवयणाइसेसपत्ते पणतीससत्तचवयणाइसेस-
 पत्ते आगासगएणं चक्केणं आगासगएणं छत्तेणं
 आगासियाहिं चामराहिं आगासफालियामएणं
 सपायवोढेणं सीहासणेणं धम्मज्झएणं पुरओ पक-
 ढिज्जमाणेणं (चउइसहिं समणसाहस्सोहिं छत्ती-
 साए अज्जियामाहस्सीहिं) सध्दिं संपरिवुडे पुव्वा-
 णुपुव्वि चरमाणे गामाणुग्गामं दूइज्जमाणे सुहंसुहेणं
 विहरमाणे चंपाए णयरीए बहिया उवणगरग्गामं
 उवागए चंपं नगरिंपुत्तण भहं चेइयं समोसरिउकामे॥

(सू० ११) तएणं से पवित्तिवाउए इमीसे
 कहाए लद्धट्ठे समाणे हट्ठ तुट्ठचित्तमाणंदिए पीइमणे
 परमसोमणस्सिए हरिसवसविसप्पमाणहियए एहाए
 कयबलिगम्मेकयकोउयमंगलपायछित्तेसुद्धप्पावेसाइं
 मंगलाइं वत्थाइं पवरपरिहिए अप्पमहग्घाभ रणालं-
 कियसरीरे सयाओ गिहाओ पडिणिक्खमइ सयाओ
 गिहाओ पडिणिक्खमित्ता चंपाए णयरीए मज्झं-

मज्जेणं जेणेव कोणियस्स रस्सणो गिहे जेणेव बा-
हिरिया उवट्ठाणसाला जेणेव कूणिए राया भंभ-
सारपुत्ते तेणेव उवागच्छइ तेणेव उवागच्छित्ता
करयलपरिग्गहियं सिरसावत्तं मत्थए अंजलिं कट्ठु
जएणं विजएणं वट्ठावेइ २ एवं वयासीः—

जस्स णं देवाणुप्पिया दंसणं कंखंति जस्स णं
देवाणुप्पिया दंसणं पीहंति जस्स णं देवाणुप्पिया
दंसणं पत्थंति जस्स णं देवाणुप्पिया दंसणं अभि-
लसंति जस्स णं देवाणुप्पिया णामगोयस्सवि सव-
णयाए हट्ठुट्ठ जाव हियया भवंति, से णं समणे
भगवं महावीरे पुब्बाणुपुब्बि चरमाणे गामाणुग्गामं
दूइज्जमाणे चंपाए णयरीए उवणगरग्गामं उवागए
चंपं णगरिं पुरुणभइं चेइयं समोसरिउकामे, तं
एवं देवाणुप्पियाणं पियट्ठयाए पियं णिवेदेमि, पियं
ते भवउ ॥

(सू० १२) तए णं से कूणिए राया
भंभसारपुत्ते तस्स पवित्तिवाउयस्स अंतिए
एयमट्ठं सोच्चा निसम्म हट्ठुट्ठ जाव हियए []
वियसियवरकमलणयणवयणे पयलिवरकडगटुडि-
यकेयूरमउडकूंडलहारविरायंतरइयवच्छे पालंबपलं-
बमाणघोलंतभूसणधरे ससंभभं तुरियं चवलं नरिंदे

सीहासणाओ अम्भुट्टेइ २ ता पायपीढाओ पच्चो-
 रुहइ २ ता [वेरुलियवरिठ्ठरिठ्ठअंजणनिउणोविय-
 मिसिमिसितमणिरयणमंडियाओ] पाउयाओ
 ओमुयइ २ ता अवहट्टु पंच रायककुहाइं, तंजहाः -
 (१) खगं (२) छत्तं (३) उप्फेसं (४) वाहणाओ
 (५) वालवीयणं एगसाडियं उत्तरासंगं करेइ २ ता
 आयंते चोक्खे परमसुइभूए अंजलिमउलियग्गहत्थे
 तित्थगराभिमुहे सत्तठ्ठ पयाइं अणुगच्छइ सत्तठ्ठ
 पयाइं अणुगच्छित्ता वामं जाणुं अंचेइ वामं जाणुं
 अंचेत्ता दाहिणं जाणुं धरणितलंसि साहट्टु तिकखु-
 त्तो मुद्धाणं धरणितलंसि निवेसइ २ ता ईसिं पच्चु-
 णमइ पच्चुक्षणमित्ता कडगतुडियथंभियाओ
 भुयाओ पडिसाहरइ २ ता करयल जाव कट्टु
 एवं वयासीः—

णमोऽत्थु णं अरिहंताणं भगवंताणं आइगराणं
 तित्थगराणं सयंसंबुद्धाणं पुरिसुत्तमाणं पुरिससी-
 हाणं पुरसिवरपुंडरीयाणं पुरिसवरगंधहत्थीणंलोगुत्त-
 माणं लोगनाहाणं लोगहियाणं लोगपईवाणं लोगप-
 ज्जोयगराणं अभयदयाणं चक्खुदयाणं मग्गदयाणं
 सरणदयाणं जीवदयाणं बोहिदयाणं धम्मदयाणं
 धम्मदेसयाणं धम्मनायगाणंधम्मसारहीणं धम्मवर-

चाउरंतचक्कवट्टीणं दीवो ताणं सरणं गई पइट्ठा अप्प-
 डिह्यवरनाणदंसणधराणं वियट्छउमाणं जिणाणं
 जावयाणं तिएणाणं तारयाणं बुद्धाणं बोहयाणं मुत्ताणं
 मोयगाणं सब्बणूणं सब्बदरिसीणं सिवमयलमरूय-
 मणंतमक्खयमब्बा बाह्मपुणरावत्ति सिद्धिगइणा-
 मधेयं ठाणं संपत्ताणं, नमोऽत्थु, णं समणस्स भगवओ
 महावीरस्स आदिगरस्स तित्थगरस्स जाव संपावि-
 इकामस्स मम धम्मायरियस्स धम्मोवदेसगस्स, वंदामि
 णं भगवंतं तत्थ गयं इहगए, पासउ मे [सैमे] भगवं
 तत्थगए इहगयंति कट्ठु वंदइ णमंसइ वंदित्ता णमंसित्ता
 सोहासणवरगए पुरत्थाभिमुहे निसीयइ, निसीइत्ता
 तस्स पवित्तिवाउयस्स अट्ठुत्तरं सयसहस्सं पीइदाणं
 दलयइ, दलइत्ता सक्कारेइ सम्माणेइ सक्कारित्ता
 सम्माणित्ता एवं वयासी—

जया णं देवाणुत्पिया ! समणे भगवं महावीरे
 इहमागच्छेज्जा इह समोसरिज्जा इहेव चंपाए णय-
 रीए बहिया पुण्णभहे चेइए अहापडिरूवं उग्गहं
 उग्गिणिहत्ता [अरहा जिणे केवली समणगण-
 परिवुडे] संजमेणं तवसा अप्पाणं भावेमाणे
 विहरेज्जा तथा णं मम एयमट्ठं निवेदिज्जासित्ति
 कट्ठु विसज्जिए ॥

(सू० १३) तए णं समणे भगवं महावीरे
 कल्लं पाउप्पभायाए रयणीए फूल्लुप्पलकमलकोमलु-
 म्मिलियंमि अहापंडुरे पहाए रत्तसोगप्पगासकिंसुय-
 सुयमुहगुंजद्वारागसरिसे कमलागरसंडबोहए उट्ठिय-
 म्मि सूरे सहस्सरसिंमि दिणयरे तेयसा जलंते []
 जेणेव चंपा णयरी जेणेव पुण्णभहे चेइए []
 तेणेव उवागच्छइ २ त्ता अहापडिरूवं उग्गहं उगि-
 रिहत्ता [] संजमेणं तवसा अप्पाणं भावेमाणे
 विहरइ ॥

(सू० १४) तेणं कालेणं तेणं समएणं समएस्स
 भगवओ महावीरस्स अंतेवासी बहवे समणा भग-
 वंतो अप्पेगइया उग्गपव्वइया भोगपव्वइया राइ-
 एणणायकोरव्वखत्तियपव्वइया भडा जोहा सेणा-
 वई पसत्थारो सेट्ठो इब्भा अएणे य बहवे एवमा-
 इणो उत्तमजाइकुलरूवविणयविष्णाणवणलाव-
 णविक्रमपहाणसोभग्गकंतिजुत्ता बहुधणधरणणि-
 चयपरियालफिडिया णरवइगुणाइरेगा इच्छियभोगा
 सुहसंपललिया किंपागफलोवमं च मुणियविसय-
 सोक्खं जलबुब्बुयसमाणं कुसग्गजलबिन्दुचंचलं
 जीवियं य णाऊण अद्ध्युवमिणं रयमिव पडग्गलगं
 संविधुणित्ताणं चइत्ता हिरणं जाव [] पव्वइया,

अप्पेगइया अद्धमासपरिआया अप्पेगइया मासप-
रिआया-एवं दुमास तिमास जाव एक्कारस अप्पेग-
इया वासपरिआया दुवास तिवास अप्पेगइया अणे-
गवासपरिआया संजमेणं तवसा अप्पाणं भावंमाणा
विहरंति ॥

(सू. १५) तेणं कालेणं तेणं समएणं समणस्स
भगवओ महावीरस्स अंतेवासी बहवे निग्गंथा
भगवंतो अप्पेगइया आभिणिबोहियणाणी जाव
केवलणाणो अप्पेगइया मणबलिया वयबलिया
कायबलिया [] अप्पेगइया मणेणं सावाणुग्गह-
समत्था [] अप्पेगइया खेलोसहिपत्ता एवं जल्लो-
सहि विप्पोसहि आमोसहि सव्वोसहि अप्पेगइया
कोबुद्धी एवं बीयबुद्धी पडबुद्धि अप्पेगइया पयाणु-
सारो अप्पेगइया संभिन्नसोया अप्पेगइया खीरा-
सवा अप्पेगइया महुयासवा अप्पेगइया सप्पिया-
सवा अप्पेगइया अक्खीणमहाणसिया एवं उज्जु-
मई अप्पेगइया विउलमई विउव्वणिट्ठिपत्ता चारणा
विज्जाहरा आगासाइवाईणो, अप्पेगइया कणगावलिं
तवोकम्मं पडिवण्णा एवं एगावलिं खुट्ठागसीहनि-
क्कीलियं तवोकम्मं पडिवण्णा अप्पेगइया महालयं
सीहनिक्कीलियं तवोकम्मं पडिवण्णा भद्दपडिमं महा-

भद्दपडिमं सन्वओभद्दपडिमं आयंबिलवध्दमाणं
 तवोकम्मं पडिवण्णा मासियं भिक्खुपडिमं एवं
 दोमासियं पडिमं तिमासियं पडिमं जाव सत्तमा-
 सियं भिक्खुपडिमं पडिवण्णा अप्पेगइया पढमं
 सत्तराइंदियं भिक्खुपडिमं पडिवण्णा जाव तच्चंस-
 त्तराइंदियं भिक्खुपडिमं पडिवण्णा अहोराइंदियं
 भिक्खुपडिमं पडिवण्णा एककराइंदियं भिक्खुप-
 डिमं पडिवण्णा सत्तसत्तमियं भिक्खुपडिमं अट्ठ-
 अट्ठमियं भिक्खुपडिमं णवणवमियं भिक्खुपडिमं
 दसदसमियं भिक्खुपडिमं [] खुड्डियं मोयपडिमं
 पडिवण्णा महल्लियं मोयपडिमं पडिवण्णा जवमज्झं
 चंदपडिमं पडिवण्णा वहर (वज्ज) मज्झं चंदपडिमं
 पडिवण्णा [] संजमेणं तवसा अप्पाणं भावेमाणा
 विहरंति ॥

(सू. १६) तेणं कालेणं तेणं समएणं समणस्स
 भगवओ महावीरस्स अंतेवासी बहवे थेरा भगवंतो
 जाइसंपण्णा कुलसंपण्णा बलसंपण्णा रुवसंपण्णा
 विणयसंपण्णा णाणसंपण्णा दंसणसंपण्णा चरित्त-
 संपण्णा लज्जासंपण्णा लाघवसंपण्णा ओयंसी
 तेयंसी वच्चंसी जसंसी जियकोहा जियमाणा
 जियमाया जियलोभा जियइंदिया जियणिहा जियप-

रोसहा जीवियासमरणभयविप्पमुक्का वयप्पहाणा
 गुणप्पहाणा करणप्पहाणा चरणप्पहाणा णिग्गहप्प-
 हाणा निच्छयप्पहाणा अज्जवप्पहाणा मद्दवप्पहाणा
 लाघवप्पहाणा खंतिप्पहाणा मुत्तिप्पहाणा विज्जा-
 पहाणा मंतप्पहाणा वेयप्पहाणा बंभप्पहाणा नय-
 प्पहाणा नियमप्पहाणा सच्चप्पहाणा सोयप्पहाणा
 चारुवणा लज्जातवस्सोजिइंदिया सोही अणियाणा
 अप्पुस्सुया अबहिल्लेसा अप्पडिलेस्सा सुसामरण-
 रया दंता इणमेव णिग्गंथं पावयणं पुरओकाउं
 विहरंति [] ।

तेसि णं भगवंताणं आयावायावि विदिता
 भवंति परवाया विदिता भवंति आयावायं
 जमइत्ता नलवणमिव मत्तमातंगा अच्छिद्दपसिण-
 वागरणा रयणकरंडगसमाणा कुत्तियावणभूया पर-
 वादियमद्दणा [] दुवालसंगिणो समत्तगणिपिडग-
 धरा सव्वक्खरसण्णिवाइणो सव्वभासाणुगामिणो
 अजिणा जिणसंकासा जिणाइव अवितहं वागर-
 माणा संजमेणं तवसा अप्पाणं भावेमाणा विहरंति॥

(सू. १७) तेणं कालेणं तेणं समएणं समणस्स
 भगवओ महावीरस्स अंतवासी बहवे अणगारा
 भगवंतो इरियासमिया भासासमिया एसणसमिया

आयाणभंडमत्तनिकखेवणासमिया उच्चारपासव-
 णखेलसिंघाणजल्लपारिट्ठावणियासमिया मणगुत्ता
 वयगुत्ता कायगुत्ता गुत्ता गुत्तिंदिया गुत्तबंभयारी
 अममा अकिंचणा [] छिण्णग्गंथा छिण्णसोया
 निरुवलेवा कंसपाईव मुक्कतोया संख इव निरंगणा
 जीवो विव अपडिहयगई जच्चकणगंपिव जाय-
 रुवा आदरिसफलगा इव पागडभाव कुम्भो इव
 गुत्तिंदिया पुक्खरपत्तं व निरुवलेवा गगणमिव नि-
 रालंबणा अणिलो इव निरालया चंदो इव सोम-
 लेसा सूरु इव दित्ततेया सागरो इव गंभीरा विहग
 इव सव्वओ विप्पमुक्का मंदरो इव अपकंपा सार-
 यसलिलं इव सुद्धहियया खगिविसाणं व एग-
 जाया भारुंडपक्खी व अप्पमत्ता कुंजरो इव सोंडीरा
 वसभो इव जायत्थामा सीहो इव दुध्दरिसा वसुं-
 धरा इव सव्वफासविसहा सुहुयहुयासणे इव
 तेयसा जलंता ।

नत्थि णं तेसिणं भगवंताणं कत्थइ पडिबंधे
 भवइ, से य पडिबंधे चउव्विहं पण्णत्ते, तं जहा-
 दव्वओ खित्तओ कालओ भावओ, दव्वओ णं
 सच्चित्ताचित्तमीसिएसु दव्वेसु, खेत्तओ गामे वा
 ण्यरे वा रण्णे वा खेत्ते वा खेले वा घरे वा अंगणे

वा, कालओ समए वा आवलियाए वा जाव
[] अयणे वा अणयरे वा, दीहकालसंजोगे,
भावओ कोहे वा माणे वा मायाए वा लोहे वा
भए वा हासे वा, एवं तेसिं ण भवइ ।

ते णं भगवंतो वासावासवज्जं अट्ठ गिम्हहे-
मंतियाणि मासाणि गामे एगराइया णयरे पंच-
राइया वासीचन्दण समाणकप्पा समलेट्टुकंचणा
समसुहदुक्खा इहलोगपरलोगअप्पडिबद्धा संसार-
पारगामी कम्मणिग्घायणट्ठाए अब्भुट्ठिया विह-
रन्ति [] ।

(सू. १८) तेसि णं भगवंताणं एएणं विहा-
रेणं विहरमाणानं इमे एयारूवे अब्भितरबाहिरए
तवोवहाणे होत्था, तं जहा-अब्भितरए (वि)
छव्विहे, बाहिरए वि छव्विहे ॥

(सू. १९) से किं तं बाहिरए ? २ छव्विहे
पणत्ते, तं जहा-(१) अणसणे (२) उणो (ओवमो)
अरिया (३) भिक्खायरिया (४) रसपरिच्चाए (५)
कायकिलेसे (६) पडिसंलीणया । से किं तं अणसणे ?
२ दुविहे पणत्ते, तं जहा-(१) इत्तरिए य (२)
आवकहिए य । से किं तं इत्तरिए ? अणेगविहे
पणत्ते, तं जहा-(१) चउत्थभत्ते (२) उट्ठभत्ते

(३) अष्टमभत्ते (४) दसमभत्ते (५) बारसभत्ते (६),
चउइसभत्ते (७) सोलसभत्ते (८) अद्धमासिए
भत्ते (९) मासिए भत्ते (१०) दोमासिए भत्ते (११)
तेमासिए भत्ते (१२) चउमासिए भत्ते (१३) पंच-
मासिए भत्ते (१४) छम्मासिए भत्ते, से तं इत्त
रिए । से किं तं आवकहिए ? २ दुविहे पणत्ते,
तं जहा-(१) पाओवगमणे य (२) भत्तपच्चक्खाणे
य । से किं तं पाओवगमणे ? २ दुविहे पणत्ते-
तं जहा-(१) वाघाइमे य (२) निव्वाघाइमे य
नियमा अप्पडिकम्मे, से तं पाओवगमणे । से किं
तं भत्तपच्चक्खाणे ? २ दुविहे पणत्ते, तं जहा-(१)
वाघाइमे य (२) निव्वाघाइमे य नियमा सपडि-
कम्मे, से तं भत्तपच्चक्खाणे, से तं अणसणे ।

से किं तं ओमोयरियाओ ? दुविहा पणत्ता,
तं जहा-(१) दव्वोमोयरिया य (२) भावोमो-
अरिया य, से किं तं दव्वोमोअरिया ? २ दुविहा
पणत्ता, तं जहा-(१) उवगरणदव्वोमोअरिया य
(२) भत्तपाणदव्वोमोअरिया य । से किं तं उवगरण-
दव्वोमोअरिया ? २ तिविहा पणत्ता, तं जहा-
(१) एगे वत्थे (२) एगे पाए (३) चियत्तोवकरण-
साइज्जण्या, से तं उवगरणदव्वोमोअरिया । से

किं तं भत्तपाणदब्बोमोअरिया ? २ अणेगविहा पणत्ता, तं जहा-(१) अट्ट कुक्कुडिअंडगप्पमाणमेत्ते कवले आहारमाणे अप्पाहारे (२) दुवालस कुक्कुडि अंडगप्पमाणमेत्ते कवले आहारमाणे अवद्धोमोअरिया (३) सोलस कुक्कुडिअंडगप्पमाणमेत्ते कवले आहारमाणे दुभागपत्तोमोअरिया (४) चडवोसं कुक्कुडिअंडगप्पमाणमेत्ते कवले आहारमाणे पत्तोमोयरिया (५) एकतीसं कुक्कुडिअंडगप्पमाणमेत्ते कवले आहारमाणे किंचूणोमोयरिया (६) बत्तीसं कुक्कुडिअंडगप्पमाणमेत्ते कवले आहारमाणे पमाणपत्ता (७) एत्तो एगेण वि घासेणं ऊणयं आहारमाहारेमाणे मसणे णिग्गंथे णो पकामरसभोईत्ति वत्तब्बं सिया, से तं भत्तपाणदब्बोमोयरिया, से तं दब्बोमोयरिया । से किं तं भावोमोयरिया ? २ अणेगविहा पणत्ता तं जहा-(१) अप्पकोहे (२) अप्पमाणे (३) अप्पमाए (४) अप्पलोहे (५) अप्पमहे (६) अप्पभंभे, से तं भावोमोयरिया, से तं ओमोयरिया । से किं तं भिक्खायरिया ? २ अणेगविहा पणत्ता, तं जहा-(१) दब्बाभिग्गहचरण (२) खेत्ताभिग्गहचरण (३) काळाभिग्गहचरण (४) भावा भिग्गहचरण (५) उक्खि-

त्तचरण (६) णिक्खित्तचरण (७) उक्खित्तणिक्खित्तचरण (८) णिक्खित्तउक्खित्तचरण (९) वट्ठिज्जमाणचरण (१०) साहरिज्जमाणचरण (११) उवणीयचरण (१२) अवणीयचरण (१३) उवणीयअवणीयचरण (१४) अवणीयउवणीयचरण (१५) संसट्ठचरण (१६) असंसट्ठचरण (१७) तज्जायसंसट्ठचरण (१८) अणायचरण (१९) मोणचरण (२०) दिट्ठलाभिए (२१) अदिट्ठलाभिए (२२) पुट्ठलाभिए (२३) अपुट्ठलाभिए (२४) भिक्खलाभिए (२५) अभिक्खलाभिए (२६) अणगिलायए (२७) ओवणिहिए (२८) परिमियपिंडवाइए (२९) सुट्ठेसणिए (३०) संखायत्तिए, से तं भिक्खायरिया ।

से किं तं रसपरिच्चाए ? २ अणेगविहे पणत्ते तं जहा-(१) णिव्वि(य)तिए (२) पणीयरसपरिच्चाए (३) आयंबिलए (४) आयामसित्थभोई (५) अरसाहारे (६) विरसाहारे (७) अंताहारे (८) पंताहारे (९) लूहाहारे से तं रसपरिच्चाए । से किं तं कायकिलेसे ? २ अणेगविहे पणत्ते, तं जहा-(१) ठाणट्ठिइए (ठाणाइए) (२) उक्कुडुआ सणिए (३) पडिमट्ठाई (४) वीरासणिए (५) नेसज्जिए दण्डायए लउडसाई (६) आयावए (७) अवाउडए (८) अकंडुयए (९)

अणिट्टहए [] सव्वगायपरिकम्मविभूसविप्पमुक्के,
 से तं कायकिलेसे । से किं तं पडिसंलीणया ?
 चउव्विहा पणत्ता, तं जहा (१) इंदियपडिसंली-
 णया (२) कसायपडिसंलीणया (३) जोगपडिसंलीणया
 (४) विवित्तसयणासणसेवणया से किं तं इंदियपडि
 संलीणया ? २ पंचविहा पणत्ता, तं जहा (१) सो-
 इंदियविसयप्पयारनिरोहो वा सोइंदियविसयपत्तेसु
 अत्थेसु रागदोसनिग्गहो वा (२) चक्खिदियविस-
 यप्पयारनिरोहो वा चक्खिदियविसयपत्तेसु अत्थेसु
 रागदोसनिग्गहो वा (३) घाणिंदियविसयप्पयार-
 निरोहो वा घाणिंदियविसयपत्तेसु अत्थेसु राग-
 दोसनिग्गहो वा (४) जिब्भिदियविसयप्पयार-
 निरोहो वा जिब्भिदियविसयपत्तेसु अत्थेसु राग-
 दोसनिग्गहो वा (५) फासिंदियविसयप्पयार-
 निरोहो वा फासिंदियविसयपत्तेसु अत्थेसु राग-
 दोसनिग्गहो वा, से तं इंदियपडिसंलीणया । से
 किं तं कसायपडिसंलीणया ? २ चउव्विहा पणत्ता
 तंजहा (१) कोहस्सुदयनिरोहो वा उदयपत्तस्स
 वा कोहस्स विफलीकरणं (२) माणस्सुदयनिरोहो
 वा उदयपत्तस्स वा माणस्स विफलीकरणं (३)
 सायाउदयनिरोहो वा उदयपत्तस्स (ताए)

मायाए विफलीकरणं (४) लोहस्सुदयणिरोहो वा
 उदयपत्तस्स वा लोहस्स विफलीकरणं, से तं
 कसायपडिसंलीणया । से किं तं जोगपडिसंलीणया ?
 २ तिविहा पणत्ता, तंजहा (१) मणजोगपडि-
 संलीणया । (२) वयजोगपडिसंलीणया (३)
 कायजोगपडिसंलीणया । से किं तं मणजोगपडिसं-
 लीणया ? (१) अकुसलमणणिरोहो वा (२)
 कुसलमणउदीरणं वा, से तं मणजोगपडिसंलीणया ।
 से किं तं वयजोगपडिसंलीणया ? (१) अकुसल-
 वयणिरोहो वा (२) कुसलवयउदीरणं वा, से तं
 वयजोगपडिसंलीणया । से किं तं कायजोगपडि-
 संलीणया ? २ जंणं सुसमाहियपाणिपाए कुम्भो
 इव गुत्तिंदिए सव्वगायपडिसंलीणे चिट्ठइ, से तं
 कायजोगपडिसंलीणया । से किं तं विवित्तसयणा-
 सणसेवणया ? २ जं णं आरामेसु उज्जाणेसु देव-
 कुलेसु सभासु पवासु पणियगिहेसु पणियसालासु
इत्थोपसुपंडगसंसत्तविरहियासु वसहोसु फासु-
एसणिज्जं पोढफलगसेज्जासंथारगं उवसंपज्जित्ताणं
विहरइ, से तं पडिसंलीणया, सेतं बाहिरए तवे ।

(सू० २०) से किं तं अग्भिंतरए तवे ? २
 छव्विहे पणत्ते । तं जहा (१) पायच्छित्तं (२)

विणओ (३) वेयावच्चं (४) सज्झाओ (५)
 भाणं (६) विउसग्गो । से किं तं पायच्छित्ते ? २
 दसविहे पणत्ते, तं जहा-(१) आलोयणारिहे
 (२) पडिक्कमणारिहे (३) तदुभयारिहे (४)
 विवेगारिहे (५) विउस्सग्गारिहे (६) तवारिहे
 (७) छेदारिहे (८) मूलारिहे (९) अणवट्टप्पा-
 रिहे (१०) पारंचियारिहे, से तं पायच्छित्ते । से किं
 तं विणए ? सत्तविहे पणत्ते, तं जहा-(१) णाण-
 विणए (२) दंसणविणए (३) चरित्तविणए (४)
 मणविणए (५) वइवणिए (६) कायविणए (७)
 लो गोवयारविणए । से किं तं णाणविणए ? पंचविहे
 पणत्ते, तं जहा-(१) आभिणिबोहियणाणविणए
 (२) सुयणाणविणए (३) ओहिणाणविणए (४) मणप-
 ज्जवणाणविणए (५) केवलणाणविणए, सेतंणाण-
 विणए । से किं तं दंसणविणए ? दुविहे पणत्ते,
 तं जहा-(१) सुस्सूसणाविणए ? (२) अणच्चा-
 सायणाविणए । से किं तं सुस्सूसणाविणए ? २
 अणेगविहे पणत्ते । तं जहा-(१) अब्भुठाणे
 इवा (२) आसणाभिग्गहे इवा (३) आसणप्प-
 दाणे इवा (४) सक्कारे इवा (५) सम्माणे इवा
 (६) किइक्कम्मे इवा (७) अंजलिपग्गहे इवा

(८) एतस्स अणुगच्छणया (९) ठियस्स पज्जु-
वासणया (१०) गच्छंतस्स पडिसंसाहणया, से तं
सुस्सुसणाविणए ।

से किं तं अणच्चासायणाविणए ? २ पणयाली-
सविहे पणत्ते, तं जहा—(१) अरहंताणं अणच्चा-
सायणया (२) अरहंतपणत्तस्स धम्मस्स अणच्चा-
सायणया (३) आयरियाणं अणच्चासायणया एवं
(४) उवज्झायाणं (५) थेराणं (६) कुलस्स (७)
गणस्स (८) संघस्स (९) किरियाणं (१०) संभो-
गिअस्स (११) आभिणिबोहियणाणस्स (१२) सुय-
णाणस्स (१३) ओहिणाणस्स (१४) मणपज्जवणा-
णस्स (१५) केवलणाणस्स (१६-३०) एएसिं चैव
भत्तिवहुमाणे (३१-४५) एएसिं सेत्तणाण चैव
वणसंजलणया, से तं अणच्चासायणाविणए
से तं दंसणविणए से किं तं चरित्तविणए ? पंचविहे
पणत्ते । तं जहा—(१) सामाइयचरित्तविणए (२)
छेदोवट्ठावणियचरित्तविणए (३) परिहारविसुद्धि-
चरित्तविणए (४) सुहुमसंपरायचरित्तविणए (५)
अहक्खायचरित्त विणए, से तं चरित्तविणए । से
किं तं मणविणए ? दुविहे पणत्ते । तं जहा—(१)
पसत्थमणविणए (२) अपसत्थमणविणए । से किं

तं अपसत्थमणविणए ? जै य मणे (१) सावज्जे
(२) सकिरिए (३) सकक्कसे (४) कडुए (५)
णिट्टरे (६) फरुसे (७) अण्हयकरे (८) छेयकरे
(९) भेयकरे (१०) परितावणकरे (११) उहवणकरे
(१२) भूओवघाइए तहप्पगारं मणो णो पहारेज्जा,
से तं अपसत्थमणविणए ? सेकिं तं पसत्थ पणोवि-
णए २ तं चेव पसत्थं णेयव्वं । एवं चेववइवि-
णओऽवि एएहिं पएहिंचेवणेयव्वो, से तं वइविणए ।

से किं तं कायविणए ? २ दुविहे पणत्ते,
तंजहा' (१) पसत्थकायविणए (२) अपस-
त्थकायविणए । से किं तं (२) अपसत्थ
कायविणए ? २ सत्तविहे पणत्ते, तं जहा
(१) अणाउत्तं गमणे (२) अणाउत्तं ठाणे
(३) अणाउत्तं निसीदणे (४) अणाउत्तं तुयट्टणे
(५) अणाउत्तं उल्लंघणे (६) अणाउत्तं पल्लंघणे
(७) अणाउत्तं सव्विदियकायजोगजुंजणया, से तं
अपसत्थकायविणए । से किं तं पसत्थकायविणए ? ए
२ एवं चेव पसत्थं भाणियव्वं, से तं पसत्थ-
कायविणए, से तं कयाविणए । से किं तं
लोगोवयार- विणए ? २ सत्तविहे पणत्ते ।
तं जहा-(१) अब्भासवत्तियं (२) परच्छंदाणु-

वत्तियं (३) कज्जहेउं (४) कयपडिकिरिया (५) अत्त-
गवेसणया (६) देसकालण्णया (७) सव्वट्ठेसु अप्प-
डिलोमया, से तं लो गोवयारविणए, से तं विणए ।

से किं तं वेयावच्चे ?, २ दसविहे पणत्ते ।
तं जहा—(१) आयरियवेयावच्चे (२) उवज्झायवे-
यावच्चे (३) सेहवेयावच्चे (४) गिलाणवेयावच्चे (५)
तवस्सिवेयावच्चे (६) थेरवेयावच्चे (७) साहाम्भिय-
वेयावच्चे (८) कुलवेयावच्चे (९) गणवेयावच्चे (१०)
संघवेयावच्चे, से तं वेयावच्चे । से किं तं सज्झाए ?
२ पंचविहे पणत्ते, तं जहा—(१) वायणा (२) पडि-
पुच्छणा (३) परियट्ठणा (४) अणुप्पेहा (५) धम्म-
कहा, से तं सज्झाए । से किं तं भाणे ? चउ-
व्विहे पणत्ते, तं जहा—(१) अट्ठज्झाणे (२) रुह-
ज्झाणे (३) धम्मज्झाणे (४) सुक्खज्झाणे । अट्ठ-
ज्झाणे चउव्विहे पणत्ते, तं जहा—(१) अमणु-
णसंपञ्चोगसंपउत्ते तस्स विप्पञ्चोगस्सतिसमण्णा-
गएयाविभवइ, (२) मणुणसंपञ्चोगसंपउत्ते तस्स
अविप्पञ्चोगस्सतिसमण्णापए यावि भवइ (३)
आयंकसंपञ्चोगसंपउत्ते तस्स विप्पञ्चोगस्सतिसम-
ण्णागए यावि भवइ (४) परिजूसियकाम भोग-
संपञ्चोगसंपउत्ते तस्स अविप्पञ्चोगस्सतिसमण्णा-

गए यावि भवइ । अट्टस्स णं भाणस्स चत्तारि लक्खणा पणत्ता, तं जहा—(१) कंदणया (२) सोयणया (३) तिप्पणया (४) विलवणया । रुइज्झाणे चउव्विहे पणत्ते, तं जहा—(१) हिंसा-
णुबंधी (२) मोसाणुबंधी (३) तेणाणबंधी (४) सार-
क्खणाणुबंधी । रुइस्स णं भाणस्स चत्तारि लक्खणा-
पणत्ता, तं जहा—(१) उसणणदोसे (२) बहुदोसे
(३) अणणाणदोसे (४) आमरणंतदोसे । धम्मज्झाणे
चउव्विहे चउप्पडोयारे पणत्ते, तं जहा—(१)
आणाविजए (२) अवायविजए (३) विवागविजए
(४) संठाणविजए । धम्मस्स णं भाणस्स चत्तारि
लक्खणा पणत्ता, तं जहा—(१) आणारुई (२)
णिसग्गरुई (३) उवएसरुई (४) सुत्तरुई । धम्मस्स
णं भाणस्स चत्तारि आलंबणा पणत्ता, तं जहा—
(१) वायणा (२) पुच्छणा (३) परियट्ठणा (४) धम्म-
कहा । धम्मस्स णं भाणस्स चत्तारि अणुप्पेहाओ
पणत्ताओ, तं जहा—(१) अणिच्चाणुप्पेहा (२) असरणा-
णुप्पेहा (३) एगत्ताणुप्पेहा (४) संसाराणुप्पेहा ।
सुक्कज्झाणे चउव्विहे चउप्पडोयारे पणत्ते,
तं जहा—(१) पुहुत्तवियक्केसवियारी (२) एगत्तवियक्के
अवियारी (३) सुहुमकिरिए अप्पडिवाई (४) ससु-

छिन्नकिरिएअणियट्ठी । सुक्कस्स णं भाणस्स चत्तारि
 लक्खणा पणत्ता, तं जहा—(१) विवेगे (२)
 विउसग्गे (३) अब्वहे (४) असम्मोहे । सुक्कस्स णं
 भाणस्स चत्तारि आलंबणा पणत्ता, तं जहा—
 (१) खंती (२) मुत्तो (३) अज्जवे (४) महवे ।
 सुक्कस्स णं भाणस्सचत्तारी अणुप्पेहाओ पणत्ताओ,
 तं जहा (१) अवायाणुप्पेहा (२) असुभाणुप्पेहा
 (३) अणंतवित्तियाणुप्पेहा (४) विप्परिणामा-
 णुप्पेहा, से तं भाणे ।

से किं तं विउस्सग्गे ? २ दुविहे पणत्ते, तं
 जहा (१) दब्बविउस्सग्गे (२) भावविउस्सग्गे य ।
 से किं तं दब्बविउस्सग्गे ? २ चउव्विहे पणत्ते,
 तं जहा (१) सरीरविउस्सग्गे (२) गणविउस्सग्गे
 (३) उव्हिविउस्सग्गे (४) भत्त पाण विउस्सग्गे,
 से तं दब्बविउस्सग्गे । से किं तं भावविउस्सग्गे ? २
 तिविहे पणत्ते, तं जहा (१) कसायविउस्सग्गे
 (२) संसारविउस्सग्गे (३) कम्मविउस्सग्गे । से
 किं तं कसायविउस्सग्गे ? २ चउव्विहे पणत्ते,
 तं जहा :— (१) कोहकसायविउस्सग्गे (२)
 माणकसायविउस्सग्गे (३) मायाकसायविउस्सग्गे
 (४) खोहकसायविउस्सग्गे, से तं कसायविउस्सग्गे ।

से किं तं संसारविउस्सग्गे ? २ चउव्विहे पणत्ते,
तं जहाः—(१) णेरइयसंसारविउस्सग्गे (२)
तिरियसंसारविउस्सग्गे (३) मणुयसंसारविउ-
स्सग्गे (४) देवसंसारविउसग्गे, से तं संसार-
विउस्सग्गे, से किं तं कम्मविउस्सग्गे ? २ अट्ठ-
विहे पणत्ते, तं जहाः—(१) णाणावरणिज्ज-
कम्मविउस्सग्गे (२) दरिसणावरणिज्जकम्मविउ-
स्सग्गे (३) वेयणिज्जकम्मविउस्सग्गे (४) मोह-
णीयकम्मविउस्सग्गे (५) आउयकम्मविउस्सग्गे
(६) णामकम्मविउस्सग्गे (७) गोयकम्मविउस्सग्गे
(८) अंतरायकम्मविउस्सग्गे, से तं कम्मविउ-
स्सग्गे, सं तं भावविउस्सग्गे से तं विउस्सग्गे ।

(सू० २१) तेणं कालेणं तेणं समएणं समणस्स
भगवओ महावीरस्स बह्वे अणगारा भगवंतो
अप्पेगइया आयारधरा जाव विवागसुयधरा
तत्थ तत्थ तहिं तहिं देसे देसे गच्छाग-
च्छिं गुम्मागुम्मिं फड्डाफड्डिं अप्पेगइया
वायंति अप्पेगइया पडिपुच्छंति अप्पेगइया परि-
यट्ठंति अप्पेगइया अणुप्पेहंति अप्पेगइया अक्खे-
वणीओ विक्खेवणीओ संवेयणीओ णिव्वेयणीओ
अउव्विहाओ कहाओ कहंति अप्पेगइया उड्डंजाणू

अहोसिरा भ्राणकोट्टोवगथा संजमेण तवसा
अप्पाणं भावेमाणा विहरंति ।

संसारभउव्विग्गा भोया जम्मणजरमरण-
करणगंभोरदुक्खपक्खुब्भियपउरसलिलं संजोग-
विओगवीइचिंतापसंगपसरियवहबंधमहल्लविउलक-
ल्लोलकलुणाविलवियलोभकलकलंतबोलबहुलं अव-
माणणफेणतिव्वखिसणपुलंपुल[]प्पभूयरोग-
वेयणपरिभवविणिवायफुरुसधरिसणासमावडिय-
कढिणकम्मपत्थरतरंगरंगंतनिच्चमच्चुभयतोयपट्टं
कसायपायालसंकुलं भवसयसहस्सकलुसजल-
संचयं पइभयं अपरिमियमहिच्छकलुसमइवाउवेग-
उद्धुम्ममाणदगरयरयंधआरवरफेणपउरआसापिवा-
सधवलं मोहमहावत्तभोगभममाणगुप्पमाणुच्छलंत-
पच्चोणियत्तपाणियपमायचंडवहुदुट्टसावयसमाहयुद्धा-
यमाणपढभारघोरकंदियमहारवरवंतभेरवरवं । अ-
ण्णाणभमंतमच्छपरिहत्थअणिहुयिंदियमहामगर-
तुरियचरियखोखुब्भमाणनच्चंतचवत्तचंचलचलंतपु-
म्मंतजलसमूहं अरइभयविसायसोगमिच्छत्तसेलसं-
कडं अणाइसंताणकम्मबंधणकिलेसचिक्खिल्लसुदु-
त्तारं अमरणरतिरियणिरयगइगमणकुडिलपरियत्त-
विउलवेलं चउरंतं महंतमणवयगं रुइं संसार-

सागरं भीमं दरिसणिज्जं तरंति धिइधणियनिप्प-
कंपणे तुरियचवलंसंवरवेरग्गतुंगकूवयसुसंपउत्तेणं
णाणसियविमलमूसिएणं सम्मत्तविसुद्धलद्धणिज्जा
मएणं धीरा संजमपोएण सलिकलिया समत्थज्झा-
णतववायपणोल्लियपहाविएणं उज्जमववसायग्गहि-
यणिज्जरणजयणउवओगणाणदंसण [चरित्त] वि-
सुद्धवय [वर] भंडभरियसारा जिणवरवयणोवदि-
ट्टमग्गेणं अकुडिलेण सिद्धिमहापट्टणाभिमुहा सम-
णवरसत्थवाहा सुसुइसुसंभाससुप्पणहसासा गामे
गामे एगरायं एगरे एगरे पंचरायं दुइज्जंता जिहं-
दिया णिब्भया गयभया सचित्ताचित्तमीसिएसु
दब्बेसु विरागयं गया संजया विरया मुत्ता लहुया
णिरवकंत्ता साहूणिहुया चरंति धम्मं ॥

(सू. २२) तेणं कालेणंतेणं समएणं समणस्य
भगवओ महावीरस्स बहवे असुरकुमारा देवा
अंतियं पाउब्भवित्था, कालमहाणोलसरिसणील
गुलियगवलअयसिकुसुमप्पगासा वियसियसयवत्त-
मिव पत्तलनिम्मलईसिंसियरत्ततंबणयणा गरुलाय-
तउज्जुतुंगणासा उअचियसिलप्पवालबिंबफलस-
णिणभाहरोट्टा पंडुरससिसयलविमलणिम्मलसंख-
गोखीरफेणदगरयमुणालियाधवलदंतसेढी हुयवह-

णिद्धं तधोयतत्तवणिज्जरत्ततलतालुजीहा अंजण-
 घणकसिणरुयगरमणिज्जणिद्धकेसा वामेगकुंडलधरा
 अहचंदणाणुलित्तगत्ता । ईसिंसिलिंधपुप्फप्पगासाइं
 सुहुमाइं असंकलिढाइं सुहुमाइं वत्थाइं पवरपरि-
 हिया वयं च पढमं समइक्कंता बिइयं च वयं असंपत्ता-
 भदे जोव्वणे वट्टमाणा तलभंगयतुडियपवरभूसण-
 निम्मलमणिरयणमंडियभुया दसमुद्दामंडियग्गहत्था
 चूलामणिचिंधगया सुरुवा महडिडिया महज्जुइया
 महब्बला महायसा महासोक्खा मडाणुभागा हार-
 विरायवच्छा कडगतुडियथंभियभुया अंगयकुंडल-
 मट्ठगंडतलाकण्णापीढधारी विचित्तवत्थाभरणा
 विचित्तमालामउलिमउडा कल्लाणगयपवरवत्थपरि-
 हिया कल्लाणगयपवरमल्लाणुलेवणा भासुरबोदी
 पलंबवणमालधरा । दिव्वेणं वण्णेणं, दिव्वेणं
 गंधेणं, दिव्वेणं रूवेणं—दिव्वेणं फासेणं दिव्वे-
 णं संघाए (घयणे) णं दिव्वेणं संठाणेणं दिव्वाए
 इड्डीए दिव्वाए जुत्तीए दिव्वाए पभाए दिव्वाए छायाए
 दिव्वाए अच्चीए दिव्वेणं दिव्वेणं तेएणं दिव्वाए
 लेसाए दस दिसाओ उज्जोवेमाणा पभासेमाणा
 समणस्स भगवओ महावीरस्स अंतियं आगम्मा-
 गम्म रत्ता समणं भगवं महावीरं तिकखुतो आ-

याहिणं पयाहिणं करेइ २ ता वंदंति णमंसंति
[वंदित्ता] णमंसित्ता ण च्चासण्णेणाइदूरे सुस्सु-
समाणा णमंसमाणा अभिमुहा बिणएणं पंजलिउडा
पंज्जुवासंति ॥

(सू० २३) तेणं कालेणं तेणं समएणं समणस्स
भगवओ महावीरस्स बहवे असुरिंदवज्जिया भव-
णवासी देवा अंतियं पाउब्भवित्था णागपइणो
सुवण्णा विज्जू अग्गीया दीवा उदहो दिसाकुमारा
य पवणथणिया य भवणवासी णागफडागरुलवय-
रपुण्णकलससीहहयगयमगरमउडवद्धमाणिज्जुत्त-
विचित्तचिंधगया सुरूवा महिडिहया सैसंतं चेव
जावपज्जुवासंति ॥

(सू० २४) तेणं कालेणं तेणं समएणं समणस्स
भगवओ महावीरस्स बहवे वाणमंतरा देवा अंतियं
पाउब्भवित्था पिसायभूया य जक्खरक्खसा किंन-
रकिंपुरिसभुयगपइणो य महाकाया गंधव्वणिकाय-
गणा णिउणगंधव्वगीयरइणो अणपण्णिय पणपणि-
यइसिवादियभूयवादियकंदियमहाकंदिया य कुहंड-
पयएयदेवा चंचलचवलचित्तकीलणदवप्पिया गंभीरह-
सियभणियपीयणीयणच्चणरई वणमालामेलमउड-
कुंडलसच्छंदविउव्वियाहरणचारुविभूसणधरा स-

व्वोउयसुरभिकुसुमसुरइयपलंबसोभंतकंतवियसंत-
चित्तवणमालरइयवच्छा कामगमी कामरूवधारी
णाणाविहवणरागवरवत्थचित्तचिल्लयणियंसणा वि
विहदेसीणेवत्थग्गहियवेसा पमुइयकंदप्पकलहकेली-
कोलाहलप्पिया हासबोलवहुला अणेगमणिरयणवि-
विहणिज्जुत्तविचित्तचिंधगया सुरूवा महिद्धिया
जाव पज्जुवासंति ॥

(सू० २५) तेणं कालेणं तेणं समएणं समणस्स
भगवओ महावीरस्स (वद्धमाणस्स) बह्वे जोइसिया
देवा अंतियं पाउब्भवित्था, विहस्सती चंदसूरसुक्कस-
णिच्छरा राहू धूमकेतुबुहा य अंगारका य तत्ततवणि-
ज्जकणगवणा जे य गहा जोइसंमि चारं चरंति केऊ
य गइरइया अट्ठावीसविहा य णक्खत्तदेवगणा
णाणासंठाणसंठियाओ य पंचवग्गणाओ ताराओ
ठियलेस्सा चारिणोय अविस्साममंडलगई पत्तेयं
णामंकपागडियचिंधमउडा महिद्धिया—जाव प-
ज्जुवासंति ॥

(सू० २६) तेणं कालेणं तेणं समएणं समणस्स
भगवओ महावीरस्स वेमाणिया देवा अंतियं पाउब्भ-
वित्था सोहम्मीसाणसणंकुमारमाहिंदबंभलंतगमहा-
सुक्कस हस्साराणयपाणयारणअच्चुयवई पहिट्ठा देवा

जिणदंसणुस्सुयागमणजणियहासा पालगपुप्फगसो-
मणससिसिरिवच्छणंदियावत्तकामगमपीइगममणो-
गमविमलसव्वओभइसरिसणामधेज्जेहिं विमाणेहिं
ओइरुणा वंदगा जिणिंदंमिगमहिसवराहळगलदद्दु-
रहयगयवइ भुयगखग्गउसभंकविडिमपागडियचिंध-
मउडा पसिढिलवरमउडतिरीडधारी कुंडलउज्जोवि-
याणणा मउडदित्तसिरया रत्ताभा पउमपम्हगोरा
सेया सुभवणणगंधफासा उत्तमवेउव्विणो विवहव-
त्थगंधमल्लधारी महिडिढया महज्जुतिया जाव पंज-
लिउडा पज्जुवासंति [] ॥

(सू० २७) तएणं चंपाए णयरीए सिंघाडगतिगच-
उक्कचच्चरचउम्मुहमहापहपहेसु महया जणसहे इ वा
[] जणवूहे इ वा जणबोले इ वा जणकलकले इ वा
जणुम्मीतिवा जणुक्कलिया इ वा जणसणिण वाए
इवा बहुजणो अरणमणस्स एवमाइक्खइ एवं भासइ
एवं पणवेइ एवं परूवेइ—“एवं खलु देवाणु-
प्पिया ! समणे भगवं महावीरे आइगरे तिथ-
गरे सयंसंबुद्धे पुरिसुत्तमे जाव संपाविउकामे पुव्वा-
णुपुर्व्वि चरमाणे गामाणुग्गामं दूइज्जमाणे इहमा-
गए इहसंपत्ते इह समोसडे इहेव चंपाए णयरीए
बाहिं पुण्णभहे चेइए अहापडिरुवं उग्गहं उग्गि-

एहिता संजमेणं तवसा अप्पाणं भावेमाणे विहरई ।
 तं महप्फलं खलु भो देवाणुप्पिया ! तहारूवाणं
 अरहंताणं भगवंताणं णामगोयस्स वि सवणयाए,
 किमंगपुण अभिगमणवंदणणमंसणपडिपुच्छणप-
 ज्जुवासणयाए? एगस्स वि आयरियस्स धम्मियस्स
 सुवयणस्स सवणयाए, किमंग पुण विउलस्स अत्थ-
 स्स गहणयाए ? तं गच्छामो णं देवाणुप्पिया !
 समणं भगवं महावीरं वंदामो णमंसामो सक्कारेमो
 सम्माणेमो कल्लाणं मंगलं देवयं चेइयं [विणएणं]
 पज्जुवासामो एयं णे पेच्चभवे इहभवे य हियाए
 सुहाए खमाए निस्सेयसाए आणुगामियत्ताए भवि-
 स्सइत्तिकट्ठु बहवे उग्गा उग्गपुत्ता भोगा भोगपुत्ता
 एवं दुपडोयारेणं राइएणा [] खत्तिया माहणा
 भडा जोहा पसत्थारो मल्लई लेच्छई लेच्छईपुत्ता
 अरणे य बहवे राईसरतलवरमाडंबियकोडुंबि-
 यइभसेट्ठि सेणावइसत्थवाहप्पभितयो अप्पेगइया
 वंदणवत्तियं अप्पेगइ या पूयणवत्तियं एवं सक्कारव-
 त्तियं सम्माणवत्तियं दंसणवत्तियं कोऊहलवत्तियं
 अप्पेगइया अट्ठविणिच्छयहेउं अस्सुयाइं सुणेस्सामो
 सुयाइं निस्संकियाइं करिस्सामो अप्पेगइया अट्ठाइं
 होऊइं कारणाइं वागरणाइं पुच्छिस्सामो अप्पेगइया

सव्वओ समंतामुंडे भवित्ता अगाराओ अणगारियं
 पव्वइस्सामो, पंचाणुव्वइयं सत्तसिक्खावइयं दुवाल-
 सविहं गिहिधम्मं पडिबज्जिस्सामो, अप्पेगइया
 जिणभत्तिरागेणं अप्पेगइया जीयमेयंति कट्ठुण्हाया
 कयबलिकम्मा कयकोउयमंगलपायच्छित्ता []
 सिरसाकंठेमालकडा आविद्धमणिसुवण्णा कप्पिय-
 हारद्धहारतिसरयपालंबपलंबमाणकडिसुत्तयसुकय-
 सोहाभरणा पवरवत्थपरिहिया [] चंदणोलित्तगा-
 यसरीरा, अप्पेगइया हयगया एवं गयगया रहगया
 सिबियागया संदमाणिपागया अप्पेगइया पायविहा-
 रचारेणो पुरिसवग्गुरापारिक्खित्ता [] महया उक्कि-
 द्विसीइणायबोलकलकलरवेणंपक्खुब्भियमहासमुद-
 रवभूयं पिवकरेमाणा [] चंपाएणयरीए मज्झम-
 ज्जेणं णिग्गच्छंति २ त्ता जेणेव पुण्णभहे चेइए
 तेणेव उवागच्छंति २ त्ता समणस्स भगवओ महावी-
 रस्स अदूरसामंते छत्तादीए तित्थयराइसेसे पासंति
 पासित्ता जाणवाहणाइं ठावइंति [] २ त्ता जाण-
 वाहणेहितां पच्चोरुहंति पच्चोरुहित्ता जेणेव समणे
 भगवं महावीरे तेणेव उवागच्छंति, उवागच्छित्ता
 समणं भगवं महावीरं तिक्खुत्तो आयाहिणं पया-
 हिणं करेति, करित्ता वंदंति णमंसंति, वंदित्ता

णमंस्सित्ता णञ्चासणे णाइदूरे सुस्सूसमाणा णमं-
समाणा अभिमुहा विणएणं पंजलिउडा पज्जुवासंति॥

(सू० २८) तए णं से पवित्तिवाउए इमीसे
कहाए लद्धे समाने हट्टुट्ट जाव हियए एहाए
जाव अप्पमहग्घाभरणालंक्रियसरीरे सयाओ गिहा-
ओ पडिणिक्खमइ, सयाओ गिहाओ पडिणिक्ख-
मित्ता चंपाणयरिं मज्झमज्झेणं जेणेव बाहिरिया
सव्वेव हेट्ठिला वत्तव्वया जाव णिसीयइ णिसो-
इत्ता तस्स पवित्तिवाउयस्स अद्धत्तेरस सयसहस्सा-
इं पीइदाणं दलयइ, २ त्ता सक्कारेइ सम्माणेइ सक्का-
रित्ता सम्माणेत्ता पडिविसज्जेइ ॥

(सू० २९) तए णं से कूणिए राया भंभ-
सारपुत्ते बलवाउयं आमंतेइ २ त्ता एवं वयासी-
खिप्पामेव भो देवाणुप्पिया ! आभिसेक्कं हत्थिर-
यणं पडिक्कप्पेहि, हयगयरहपवरजोहकलियं च चा-
उरंगिणिं सेणं सण्णाहेहि, सुभद्दापमुहाण य
देवीणं बाहिरियाए उवट्ठाणसालाए पाडिएक्कपाडि-
एक्काइं जत्ताभिमुहाइं जुत्ताइं जाणाइं उवट्टवेह
चंपं णयरिं सग्भिंतरबाहिरियं [] आसित्त-
सित्तसुइसम्मट्ठरत्थंतरावणवीहियं मंचाइमंचकलि-
यं णाणाविहरागउच्छियउक्कयपडागाइपडागमंडियं

आउल्लोह्यमहियं गोसीससरसरत्तचंदण जाव
गंधवट्टिभूयं करेह कारवेह करित्ता कारवेत्ता एयमा-
णत्तियं पच्चप्पिणाहि । णिज्जाहिस्सामि समणं भगवं
महावीरं अभिवंदए ॥

(सू० ३०) तए णं से बलवाउए कूणिएणं
रण्णा एवं वुत्ते समाणे हट्ठतुट्ठ जाव हियए करय-
त्तपरिग्गहियं सिरसावत्तं मत्थए अंजलिं कट्ठु एवं
वयासी-सामित्ति आणाए विणएणं वयणं पडिसुणेइ
२ त्ता हत्थिवाउयं आमंतेइ आमंतेत्ता एवं वयासि-
खिप्पामेव भो देवाणुप्पिया ! कूणियस्स रण्णो
भंभसारपुत्तस्स आभिसेक्कं हत्थिरयणं पडिकप्पे-
हि हयगयरहपवरजोहकलियं चाउरंगिणिं सेणं
सण्णाहेहि सण्णाहेत्ता एयमाणत्तियं पच्चप्पिणाहि ।

तए णं से हत्थिवाउए बलवाउयस्स एयमट्ठं
सोच्चा आणाए विणएणं वयणं पडिसुणेइ पडिसु-
त्तित्ता [] छेयायरियउवएसमइविकप्पणाविकप्पे-
हिं सुणित्तेहिं उज्जलणेवत्थहत्थपरिवत्थियं सुस-
ज्जं धम्मियसणद्धवद्धकवइयउप्पीलियकच्चवच्च-
गेवेयबद्धगलवरभूसणविरायंतं अहियतेयजुत्तं स-
ललियवरकणपूरविराइयं पलंबउच्चूलमहुयरकयं-
धयारं चित्तपरिच्छेअपच्छयं पहरणावरणभरियजु-

द्धसज्जं सच्छत्तं सज्झयं सघटं सपडागं पंचा-
 मेलयपरिमंडियाभिरामं ओसारियजमलजुयलघटं
 विज्जुपणद्धं व कालमेहं उप्पाइयपव्वयं व चंकमंतं
 मत्तं [] गुलगुलंतं मणपवणजइणवेगं भीमं संग-
 मियाओग्ग आभिसेक्कं हत्थिरयणं पडिकप्पइ पडिका
 त्ता ह्यगयरहपवरजोहकलियं चाउरंगिणिं सेणं रु
 ण्णाहेइ सण्णाहिक्का जेणेव बलवाउए तेणेव उवा-
 गच्छइ उवागच्छित्ता एयमाणत्तियं पच्चप्पिणइ ॥

तए णं से बलवाउए जाणसालियं सदावेइ २
 त्ता एवं वयासी-खिप्पामेव भो देवाणुप्पिया ! सु-
 भद्दापमुहाणं देवीणं बाहिरियाए उवट्ठाणसालाए
 पाडिएक्कपाडिएक्काइं जत्ताभिमुहाइं जुत्ताइं जाणाइं
 उवट्ठवेइ २ त्ता एयमाणत्तियं पच्चप्पिणाहि ।

तए णं से जाणसालिए बलवाउयस्स एयमट्ठं
 आणाए विणएणं वयणं पडिसुणेइ २ त्ता जेणेव
 जाणसाला तेणेव उवागच्छइ तेणेव उवागच्छित्ता
 जाणाइं पच्चुवेक्खेइ २ त्ता जाणाइं संपमज्जेइ २
 त्ता जाणाइं संवट्ठेइ २ त्ता जाणाइं णीणेइ २ त्ता
 जाणाणं दूसे पवीणेइ २ त्ता जाणाइं समलंकरेइ
 २ त्ता जाणाइं वरभंडगमंडियाइं करेइ २ त्ता जेणेव
 बाहणसाला तेणेव उवागच्छइ २ त्ता [] वाह-

णाइं पच्चुवेक्खेइ २ ता वाहाणाइं संपसज्जइ २ ता
वाहणाइं णीणेइ २ ता वाहणाइं अप्फालेइ २ ता
दूसे पवीणेइ २ ता वाहणाइं समलंकरेइ २ ता
वाहणाइं वरभंडगमंडियाइं करेइ २ ता वाहणाइं
जाणाइं जोएइ २ ता पओयलट्ठिं पओयधरे य
समं आडहइ २ ता वट्टमगं गाहेइ २ ता जेणेव
बलवाउए तेणेव उवागच्छइ २ ता बलवाउस्स
एयमाणत्तियं पच्चप्पिणइ ।

तए णं से बलवाउए णयरगुत्तियं आमंतेइ
२ ता एवं वयासी—खिप्पामेव भो देवाणुप्पिया !
चंपं णयरिं सग्भिंतरबाहिरियं आसित्त जाव कार-
वेत्ता एयमाणत्तियं पच्चप्पिणाहि ।

तए णं से णयरगुत्तिए बलवाउयस्स एयमट्ठं
आणाए विणएणं पडिसुणेइ २ ता चंपं णयरिं
सग्भिंतरबाहिरियं आसित्त जाव कारवेत्ता जेणेव
बलवाउए तेणेव उवागच्छइ २ ता एयमाणत्तियं
पच्चप्पिणइ ।

तए णं से बलवाउए कोणियत्स रणो भंभ-
सार पुत्तस्स आभिसेक्कं हत्थिरयणं पडिकप्पियं
पासइ हयगय जाव सरणाहियं पासइ, सुभदाप-
सुहाणं देवीणं पडिजाणाइं उवट्ठवियाइं पासाइ चंपं

णयरिं सग्भिंतर जाव गंधवट्टिभूयं कयं पासइ,
 पासित्ता हट्टतुट्टचित्तमाणंदिए [णंदिए] पीअमणे
 जाव हियए जेणेव कूणिए राया भंभसारपुत्ते तेणेव
 उवागच्छइ २ ता करयल जाव एवं वयासी—क-
 प्पिए णं देवाणुप्पियाणं आभिसेक्के हत्थिरयणे हय-
 गय जाव पवरजोहकलिया य चाउरंगिणी सेणा
 सण्णाहिया सुभद्दापमुहाणं य देवीणं बाहिरियाए
 उवट्टाणसालाए पाडिएक्कपाडिएक्काइं जत्ताभिमुहा-
 इं जुत्ताइं जाणाइं उवट्टावियाइं चंपाणयरी सग्भि-
 तरबाहिरिया आसित्त जाव गंधवट्टिभूया कया, तं
 णिज्जंतुणं देवाणुप्पिया ! समणं भगवं महावीरं
 अभिवंदया ॥

(सू० ३१) तए णं से कूणिए राया भंभसार-
 पुत्ते बलवाउयस्स अंतिए एयमट्ठं सोच्चा णिसम्म
 हट्टतुट्ट जाव हियए जेणेव अट्टणसाला तेणेव उवा-
 गच्छइ २ ता अट्टणसालं अणुपविसइ २ ता
 अणेवगवायामजोगणवामइणमल्लजुद्धकरणेहिं संते
 परिस्संते सयपागसहस्सपागेहिं सुगंधतेल्लमाइएहिं
 पीणणिज्जेहिं दप्पणिज्जेहिं मयणिज्जेहिं विंह-
 णिज्जेहिं सव्विंदियगायपल्हायणिज्जेहिं अग्भि-
 गेहिं अग्भिगिए समाणे तेल्लचम्मंसि पडिपुण-

पाणिपायसुउमालकोमलतलेहिं पुरिसेहिं छेएहिं
 दक्खेहिं पट्टेहिं कुसलेहिं मेहावीहिं निउण-
 सिप्पोवगएहिं अब्भिमगणपरिमदणुव्वलणकरण-
 गुणणिम्माएहिं अट्टिसुहाए मंससुहाए तथासुहाए
 रोमसुहाए चउव्विहाए संवाहणाए संबाहिए
 समाणे अवगयत्थेयपरिस्समे अट्टणसालाओ पडि-
 णिक्खमइ पडिणिक्खमित्ता जेणेव मज्जणघरे तेणेव
 उवागच्छई २ त्ता मज्जणघरं अणुव्विसई २ त्ता
 समुत्तजालाउलाभिरामे विचित्तमणिरयणकुट्टिमयले
 रमणिज्जे एहाणमंडवंसि णाणामणिरयणभत्ति-
 सि एहाणपीढंसि सुहणिसण्णे सुद्धोदएहिं
 गंधोदएहिं पुप्फोदएहिं सुहोदएहिं पुणो २ कल्लाण-
 गपवरमज्जणविहीए मज्जिए तत्थ कोउयसएहिं
 बहुविहेहिं कल्लाणगपवरमज्जणावसाने पम्हलसु-
 कुमालगंधकासाइयलूहियंगे सरससुरहिगोसीस-
 चंदणाणुलित्तगतते अहयसुमहग्घदूसरयणसुसंवुए
 सुइमालावणणगविलेवणे य आविद्धमणिसुवण्णे
 कप्पियहारद्धहारतिसरयपालंबपलंबमाणकडिसुत्त-
 सुकयसोभे पिणद्धगेविज्जअंगुलिज्जगललियंगय-
 ललियकयाभरणे वरकडगतुडियथंभियभुए अहिय-
 रूवसस्सिरीए मुद्दीयपिंगलंगुलीए कुंडलउज्जोविया-

णणे मउडदित्तसरिए हारोत्थयसुकयरइयचच्छे
 पालंबपलंबमाणपडसुकयउत्तरिज्जे णाणामणिक-
 णगरयणविमलमहरिहणिउणोवियमिसिमिसंतविर-
 इयसु सिलिह्विसिह्वलह्वआविद्धवीरवलए किं बहुणा
 कप्परुक्खए चेव अलंकियविभूसिए णरवई सकोरं-
 टमल्लदामेणं [] छत्तेणं धरिज्जमाणेणं चउचामरवा-
 लवीइयंगे [] मंगलजयसहकयालोए मज्जणघरा-
 ओ पडिणिक्खमइ २ ता अणेगणनायगदंडनाय-
 गरईसरतलवरमाडंबियकोडुंबियइब्भसेट्टिसेणाव-
 इसत्थवाहदूयसंधिवालसद्धिं संपरिवुडे धवल महा-
 मेहाणिग्गए इव गहगणदिप्पंतरिक्खतारागणाण
 मज्जे ससिब्ब पिअदंसणे णरवई जेणेव बाहिरिया
 उवट्ठाणसाला जेणेव आभिसेक्के हत्थिरयणे तेणेव
 उवागच्छइ उवागच्छित्ता अंजणगिरिकूडसणिभं
 गयवइं णरवई दुरुढे ।

तए णं तस्स कूणियस्स रणो भंभसारपुत्त-
 स्स आभिसेक्कं हत्थिरयणं दुरुढस्स समाणस्स
 तप्पढमयाए इमे अट्ठ मंगलया पुरओ अहाणुपु-
 व्वीए संपट्टिया, तं जहाः—सोवत्थिय-सिरि-
 वच्छ-णंदियावत्त—वद्धमाणग-भहासण-कलस-
 मच्छ-दप्पण । तयाणंतरं च णं पुण्णकलसभि-

गारं दिव्वा य छत्तपडागा सचामरा दंसणरइय-
 आलोयदरिसणिज्जा वाउद्धयविजयवेजयंती य
 ऊसिया गगणतलमणुलिहंती पुरओ अहाणुपुव्वीए
 संपट्टिया, तथाणंतरं च णं वेरुलियभिसंतविमल-
 दंडं पलंबकोरंटमल्लदामोवसोभियं चंदमण्डल-
 णिभं समूसियं विमलं आयवत्तं पवरं सीहासणं
 वरमणिरयणपादपीढं सपाउयाजोयसमाउत्तं बहु-
 किंकरकम्मकरपुरिसपायत्तपरिक्खित्तं पुरओ अहा-
 णुपुव्वीए संपट्टियं । तथाणंतरं [च णं] बहवे लट्ठि-
 ग्गाहा कुंतग्गाहा चावग्गाहा चामरग्गाहा पासग्गाहा
 पोत्थयग्गाहा फलगग्गाहा पीढग्गाहा वीणग्गाहा
 कूवग्गाहा हडप्पयग्गाहा पुरओ अहाणुपुव्वीए
 संपट्टिया । तथाणंतरं [च णं] बहवे दंडिणो मुंडिणो
 सिंहंडिणो जडिणो पिच्छिणो हासकरा डमरकरा
 चाडुकरा वादकरा कंदप्पकरा दवकरा कोकुइया
 किट्टिकरा (य) वायंता (य) गायंता (य) हसंता (य)
 णच्चंता (य) भासंता (य) सावेता (य) रक्खंता (य)
 [कचित्त्रवेता य] आलोयं च करेमाणाजय २ सहं
 पउंजमाणा पुरओ अहाणुपुव्वीए संपट्टिया । []

तथाऽणंतरं [च णं] जञ्चाणं तरमल्लिहायणाणं
 हरिमेलामउलमल्लियच्छाणं चुं चुच्चियललियपुलिय-

चलचवलचंचलगईणं लंघणवगणधावणधोरणति-
 वईजइणसिक्खियगईणं ललंतलामगललायवरभू-
 सणाणं मुहभंडगओचूलगथासगअहिलाणचामरग-
 षडपरिमण्डियकडीणं किंकरवरतरुणपरिग्गहियाणं
 अट्टसयं वरतुरगाणं पुरओ अहाणुपुव्वीए संपट्ठियं।
 तथाणंतरं च णं ईसीदंताणं ईसीमत्ताणं ईसीतुंगाणं
 ईसीउच्छंगविसालधवलदंताणं कंचणकोसीपविट्ठ-
 दंताणं कंचणमणिरयणभूसियाणं वरपुरिसारोहग-
 संपउत्ताणं अट्टसयं गयाणं पुरओ अहाणुपुव्वीए
 संपट्ठियं । तथाऽणंतरं [च णं] सच्छत्ताणं सज्झयाणं
 सघंटाणं सपडागाणं सतोरणवराणं सणंदियोसाणं
 सखिंखिणीजालपरिक्खित्ताणं हेमवयचित्तिणिग-
 कणगणिज्जुत्तदारुयाणं कालायससुकयणेमिजंतक-
 म्माणं सुसिलिट्ठवत्तमंडलधुराणं आइणवरतुरगसं-
 पउत्ताणं कुसलनरच्छेयसारहिसुसंपग्गाहियाणं []।
 वत्तोसतो णपरिमंडियाणं सकंकडवडेंसगाणं सचाव-
 सरपहरणावरणभरियजुद्धसज्जाणं अट्टसयं रहाणं
 पुरओ अहाणुपुव्वीए संपट्ठियं । तथाणंतरं च णं
 असिसत्तिकुंततोमरसूललउलभिंडिमालधणुपाणि-
 सज्जं पायत्ताणीयं [] पुरओ अहाणुपुव्वीए
 संपट्ठियं ।

तए णं से कूणिए राया हारोत्थयसुकयरइय-
वच्छे कुंडलउज्जोवियाणणे मउडदित्तसिरए णर-
सीहे णरवई णरिंदे णरवसहे मणुयरायवसभकप्पे
अब्भहिय रायतेयलच्छीए दिप्पमाणे हत्तिक्खंधव-
रगए सकोरंटमल्लदामेणं छत्तेणं धरिज्जमाणेणं
सेयवरचामराहिं उद्धुव्वमाणीहिं २ वेसमणो चेव
णरवई अमरवईसणिभाए इड्ढीए पहियकित्ती
हयगयरहपवरजोहकलियाए चाउरंगिणीए सेणाए
समणुगम्ममाणमग्गे जेणेव पुण्णभद्दे चेइए तेणेव
पहारेत्थ गमणाए ।

तए णं तस्स कूणियस्स रण्णो भंभसारपुत्तस्स
पुरओ महंआसा आसधरा उभओ पासिं णागा
णागधरा पिट्ठओ रहसंगेल्लि ।

तए णं से कूणिए राया भंभसारपुत्ते अब्भुग्ग-
यभिंगारे षग्गहियतालयंटे ऊच्छियसेयच्छत्ते पवी-
इयवालवीयणीए सव्विड्ढीए सव्वजुत्तीए सव्वब-
लेणं सव्वसमुदएणं सव्वादरेणं सव्वविभूईए सव्व
विभूसाए सव्वसंभमेणं [] सव्वपुप्फगंधमल्ला-
लंकारेणं सव्वतुडियसद्दसणिण्णाएणं महया इड्-
ढीए महया जुईए महया बलेणं महया समुदएणं
महया वरतुडियजमगसमगप्पवाइएणं संखपणवप-

डहभेरिभल्लरिखरमुहिहुडुक्कमुखमुअंगदुंदुहिण्णिघो-
सणाइयरवेणं चंपाए णयरीए मज्झं मज्झेणं
णिग्गच्छइ ॥

(सू० ३२) तए णं तस्स कूणियस्स रण्णो
चंपानगरिं मज्झंमज्झेणं निग्गच्छमाणस्स बह्वे
अत्थत्थिया कामत्थिया भोगत्थिया किब्बि-
सिया कारोडिया लाभत्थिया कारवाहिया संखिया
चक्किया एंगलिया मुहमंगलिया वद्धमाणा पुस्समा-
णवा खंडियगणा ताहिं इट्ठाहिं कंताहिं पियाहिं
मणुण्णाहिं मणामाहिं मणाभिरामाहिं []
हिययगमणिज्जाहिं वग्गूहिं जयविजयमंगल-
सएहिं अणवरयं अभिणंदंता य अभित्थुणंता य
एवं वयासी-जय जय णंदा ! जय जय भद्दा ! भद्दं
ते अजियं जिणाहिं जियं (च) पालेहिं जियमज्झे
वसाहिं । इंदो इव देवाणं चमरो इव असुराणं
धरणो इव नागाणं चंदो इव ताराणं भरहो इव
मणुयाणं बहूइं वासाइं बहूइं वाससयाइं बहूइं
वाससहस्साइं बहूइं वाससयसहस्साइं अणहस-
मग्गो हट्ठतुट्ठो परमाउं पालयाहिं इट्ठजणसंपरिवुडो
चंपाए णयरीए अण्णोसिं च बहूणं गाभागरणयर-
खेडकब्बडदोणमुहमडंबपट्टणआसमनिगमसंवाहसं-

निवेसाणं आहेवच्चं पोरेवच्चं सामित्तं भट्ठित्तं
महत्तरगतं आणाईसरसेणावच्चं कारेमाणे पाले-
माणे महयाऽहयणदृगोयवाइयतंतोतलतालतुडियघ-
णमुअंगपडुप्पवाइयरवेणं विउलाइं भोगभोगाइं
भुंजमाणे विहराहिति कट्ठु जय २ सहं पउंजंति ।

तए णं से कूणिए राया भंभसारपुत्ते णयण
मालासहस्सेहिं पेच्छिज्जमाणे २ हिययमाला-
सहस्सेहिं अभिणंदिज्जमाणे [कचित् उन्नोइज्जमाणे]
मणोरहमालासहस्सेहिं विच्छिप्पमाणे २ वयणमा-
लासहस्सेहिं अभियुव्वमाणे २ कंति (दिव्व) सोह-
ग्गुणेहिं पत्थिज्जमाणे २ बहूणं णरणारिसहस्साणं
दाहिणहत्थेणं अंजलिमालासहस्साइं पडिच्छमाणे २
मंजुमंजुणा घोसेणं पडिवुज्झमाणे २ भवणपंति-
सहस्साइं समइच्छमाणे २ [] चंपाए नघरीए
मज्झं-मज्झेणं निग्गच्छइ २ ता जेणेव पुण्णभदे
चेइए तेणेव उवागच्छइ २ ता समणस्स भगवओ
महावीरस्स अदूरसामंते छत्ताईए तित्थयराइसेसे
पासइ पासित्ता आभिसेक्कंहत्थिरयणं ठवेइ ठवित्ता
आभिसेक्काओ हत्थिरयणाओ पच्चोरुइ २ ता
अवहट्ठु पंच रायकउहाइं, तं जहा-खग्गं छत्तं
उप्फेसं वाहणाओ वालवीयणं जेणेव समणे भगवं

महावीरे तेणेव उवागच्छइ उवागच्छित्ता समणं
 भगवं ममहावीरं पंचविहेणं अभिगमेणं अभिग-
 च्छइ । तं जहा (१) सचित्ताणं दव्वाणं विउसर-
 णयाए (२) अचित्ताणं दव्वाणं अविउसरणयाए
 (३) एगसाडियं उत्तरासंगकरणेणं (४) चक्खुप्फासे
 अंजलिपग्गहेणं [हत्थिखंधविट्ठंभणयाए] (५) मणसो
 एगत्तभावकरणेणं समणं भगवं महावीरं तिकखुत्तो
 आयाहिणपयाहिणं करेत्ता बंदति रामंसति बंदित्ता
 णमंसित्ताहाए पज्जुवासणयाए पज्जुवासइ, तं
 जहाः—काइयाए वाइयाए माणसियाए काइयाए—ताव
 संकुइयग्गहत्थपाए सुस्सूसमाणे णमंसमाणे अभि-
 मुहे विणएणं पंजलिउडे पज्जुवासइ वाइयाए—जं
 जं भगवं वागरेइ एवमेयं भंते ! तहमेयं भंते !
 अवितहमेयं भंते ! असंदिद्धमेयं भंते ! इच्छियमेयं
 भंते ! पडिच्छियमेयं भंते ! इच्छियपडिच्छियमेयं
 भंते ! से जहेयं तुब्भे वदह अपडिकूलमाणे पज्जु-
 वासइ माणसियाए—महयासंवेगं जणइत्ता तिब्ब-
 धम्माणुरागरत्तो पज्जुवासइ ॥

(सू० ३३) तए णं ताओ सुभइप्पमुहाओ
 देवीओ अंतो अंतेउरंसि एहायाओ जाव पायच्छि-
 त्ताओ सव्वालंकारविभूसियाओ [] बहूहिं

खुज्जाहिं चिलार्इहिं वामणीहिं वडभीहिं बन्वरीहिं
 पउयासियाहिं जोणियाहिं पण्हवियाहिं इसिगिणि-
 याहिं वासिइणियाहिं लासियाहिं लउसियाहिं
 सिंहलीहिं दमिलीहिं आरबीहिं पुलिंदीहिं पक्कणी-
 हिं बहलीहिं मरुंडीहिं सबरियाहिं पारसोहिं
 णाणादेसीविदेसपरिमंडियाहिं इंगियच्चितियपत्थिय-
 विजाणियाहिं सुदेसणेवत्थग्गहियवेसाहिं चेडिया-
 चक्कवालवरिसधरकंचुइज्जमहत्तरवंदपरिक्खित्ताओ
 अंतेउराओ णिग्गच्छंति २ त्ता जेणेव पाडिएक्कजा-
 णां तेणेव उवागच्छंति उवागच्छित्ता पाडिएक्क-
 पाडिएक्कां जत्ताभिमुहां जुत्तां जाणां दुरुहंति
 दुरुहित्ता णियगपरियाल सद्धिं संपरिवुडाओ चंपाए
 णयरोए मज्झमज्झेणं णिग्गच्छंति णिग्गच्छित्ता
 जेणेव पुण्णभद्दे चेएइ तेणेव उवागच्छंति उवाग-
 च्छित्ता समणस्स भगवओ महावीरस्स अदूरसा-
 मंते छत्तादीए तित्थयराइसेसे पासंति पासित्ता
 पार्डिएक्कपाडिएक्कां जाणां ठवेति ठवित्ता जाणे-
 हितो पच्चोरुहंति २ त्ता वहहिं खुज्जाहिं जाव परि-
 क्खित्ताओ जेणेव समणे भगवं महावीरे तेणेव
 उवागच्छंति २ त्ता समणं भगवं महावीरं पंचवि-
 हेणं अभिगमेणं अभिगच्छंति, तं जहा (१) सच्चि-

त्ताणं दव्वाणं विउसरण्याए (२) अच्चित्ताणं
 दव्वाणं अविउसरण्याए (३) विणओण्याए गाय-
 लट्ठीए (४) चक्खुप्फासे अंजलिपग्गहेणं (५) मणसो
 एगत्तिभावकरणेणं समणं भगवं महावीरं तिकखु-
 त्तो आयाहिणपयाहिणं करेन्ति वंदंति णमं-
 संति वंदित्ता णमंसित्ता कूणियरायं पुरओकट्टु ठिइ-
 याओ चेव सपरिवाराओ अभिमुहाओ विणएणं
 पंजलि उडाओ पज्जुवासंति ॥

(सू० ३४) तए णं समणे भगवं महावीरे कूणि-
 अस्सरणो भंभसारपुत्तस्स सुभद्दपमुहाणं देवीणं
 तीसे य महतिमहालियाए परिसाए इसिपरिसाए
 मुणिपरिसाए जइपरिसाए देवपरिसाए अणेगसयाए
 अणेगसयवंदाए अणेगसयवंदपरिवाराए ओहबले
 अइबले महब्बले अपरिमियबलवीरियतेयमाहप्पकं-
 तिजुत्ते सारयणवत्थणियमहुरगंभोरकोंचणिग्घोस-
 दुंदुभिस्सरे उरेवित्थडाए कंठेऽवट्ठियाए सिरे सेमा-
 हण्णाए अगरलाए अमम्मणाए सुव्वक्खरसखिण-
 वाइयाए पुण्णरत्ताए सव्वभासाणुगामिणीए सर-
 स्सइए जोयणणीहारिणा सरेणं अद्धमागहाए भा-
 साए भासइ अरिहा धम्मं परिकहेइ ।

तेसिं सव्वेसिं आरियमणारियाणं अगिलाए धम्मं
 आइक्खइ, साविय णं अद्वमागहा भासा तेसिं
 सव्वेसिं आरियमणारियाणं अप्पणो सभासाए
 परिणामेणं परिणमइ, तं जहा-अत्थि लोए अत्थि
 अलोए एवं जीवा अजीवा बंधे मोक्खे पुण्णे पावे
 आसवे संवरे वेयणा णिज्जरा अग्रिहंता चक्खवट्ठी
 बल्लदेवा वासुदेवा नरगा णेरइया तिरिक्खजोणिया
 तिरिक्खजोणिणीओ माया पिया रिसओ देवा देव-
 लोया सिद्धी सिद्धा परिणिब्बाणे परिणिब्बुया,
 अत्थि (१) पाणाइवाए (२) मुसावाए (३) आदिण्णा-
 दाणे (४) मेहुणे (५) परिग्गहे अत्थि (६) कोहे
 (७) माणे (८) माया (९) लोभे अत्थि जाव []
 (१०) मिच्छादंसणसल्ले । अत्थि पाणाइवायवेरमणे
 मुसावायवेरमणे अदिण्णादाणवेरमणे मेहुणवेरमणे
 परिग्गहवेरमणे जाव मिच्छादंसणसल्लविवेगे सव्वं
 अत्थिभावं अत्थित्ति वयति, सव्वं णत्थिभावं णत्थि-
 त्ति वयति, सुचिण्णा कम्मा सुचिण्णफला भवन्ति,
 दुचिण्णा कम्मा दुचिण्णफला भवन्ति, फुसइ पुण्ण-
 पावे, पच्चायन्ति जीवा, सफले कल्ल्हाणपावए । धम्म-
 माइक्खइः-इणमेव णिग्गंथे पावयणे सव्वे अणुत्तरे
 केवलए संसुद्धे पडिपुखणे णेयाउए सल्लकत्तणे

सिद्धिमग्गे मुत्तिमग्गे णिव्वाणमग्गे णिज्जाणमग्गे
 अवितहमविसंधि सव्वदुक्खप्पहीणमग्गे इहद्विधा
 जीवा सिज्झंति बुज्झंति मुच्चंति परिणिव्वायंति
 सव्वदुक्खाणमंतं करंति । एगच्चा पुण एगेभयंतारो
 पुव्वकम्मावसेसेणं अणण्यरेसु देवलोएसु देवत्ताए
 उववत्तारो भवंति, महड्ढिएसु जाव महासुक्खेसु
 दूरंगइएसु चिरट्ठिईएसु । ते एं तत्थ देवा भवंति
 महिड्ढिया जाव चिरट्ठिइया हारविराइयवच्छा जाव
 [] पभासमाणा कप्पोवगा गतिकल्लाणा ठिइ-
 कल्लाणा आगमेसिभद्दा जाव पडिरूवा । तमाइ-
 क्खइ एवं खलु चउहिं ठाणेहिं जीवा णेरइयत्ताए
 कम्मं पकरंति, णेरइयत्ताए कम्मं पकरेत्ता णेरइएसु
 उववज्जंति, तं जहा-१ महारंभयाए २ महापरि-
 गगहयाए ३ पंचिंदियवहेणं ४ कुणिमाहारेणं, एवं
 एएणं अभिलावेणं । तिरिवखजोणि एसु (१) माइ-
 ल्लयाए णियडिल्लयाए (२) अलियवयणेणं (३) उक्कं-
 चणयाए (४) वंचणयाए । मणुस्सेसु-(१) पगइभद्द-
 याए (२) पगइविणीययाए (३) साणुक्कोसयाए
 (४) अमच्छरिययाए । देवेसु—(१) सरागसंजमेणं
 (२) संजमासंजमेणं (३) अकामणिज्जराए (४) बाल-
 तवोकम्मेणं, तमाइक्खइः—

जह णरगा गम्मंती जे णरगा जा यवेयणाणरए ।
 सारीरमाणुसाइं दुक्खाइं तिरिक्खजोणीए ॥१॥
 माणुस्सं च अणिच्चं वाहिजरामरणवेयणापउरं ।
 देवे य देवलोए देविडिंढ देवसोकखाइं ॥२॥
 णरगं तिरिक्खजोणिं माणुसभावं च देवलोअं च ।
 सिद्धे अ सिद्धवसहिं छज्जीवणियं परिकहेइ ॥३॥
 जह जीवा बज्झंती मुच्चंती जह य संकिलिस्संति ।
 जह दुक्खाणं अंतं करंति केई अपडिबद्धा ॥४॥
 अट्टदुहट्टियचित्ता जह जीवा दुक्खसागरमुविंति ।
 जह वेरग्गमुवमया कम्मसमुग्गं विहाडंति ॥ ५ ॥
 जह रागेण कडाणं कम्माणं पावगो, फलविवागो ।
 जह य परिहीणकम्मा सिद्धा सिद्धालयमुविंति ॥६॥

तमेव धम्मं दुविहं आइक्खइ, तं जहा-अगार-
 धम्मं अणगारधम्मं च । अणगारधम्मो ताव-इह
 खलु सव्वओ सव्वत्ताए मुण्डे भवित्ता अगाराओ
 अणगारियं पव्वइयस्स सव्वाओ पाणाइवायाओ
 वेरमणं, सव्वाओ मुसावायाओ वेरमणं, सव्वाओ
 अदिण्णादाणाओ वेरमणं, सव्वाओ मेहणाओ
 ओरमणं सव्वाओ परिग्गहाओ वेरमणं, सव्वाओ

राईभोयणाओ वेरमणं अयमाउसो ! अणगारस्स-
माइए धम्मे पणत्ते, एयस्स धम्मस्स सिक्खाए
उवट्टिए णिग्गंथे वा णिग्गंथी वा विहरमाणे
आणाए आराहए भवति ।

अगारधम्मं दुवालसर्विह आइक्खइ, तं जहा:-
(१) पंच अणुव्वयाइं (२) तिणिण गुणव्वयाइं,
(३) चत्तारि सिक्खावयाइं । पंच अणुव्वयाइं,
तं जहा-(१) थूलाओ पाणाइवायाओ वेरमणं
(२) थूलाओ मुत्तावायाओ वेरमणं (३)
थूलाओ अदिण्णादाओ वेरमणं (४) सदार-
संतोसे (५) इच्छापरिमाणे । तिणिण गुणव्वयाइं
तं जहा-(६) अणत्थदंडवेरमणं (७) दिसिन्वयं (८)
उवभोगपरिभोगपरिमाणं । चत्तारि सिक्खाव-
याइं, तं जहा-(९) सामाइयं (१०) देसावयासियं
(११) पोसहोवववासे (१२) अतिहिसंविभागे, अप-
च्छिमा मारणंतिया संजेहणाजूसणाराहणा अयमा-
उसो ! अगारसामाइए धम्मे पणत्ते एयस्स धम्म-
स्स सिक्खाए उवट्टिए समणोवासए वा समणोवा-
सिया वा विहरमाणे आणाए आराहए भवइ ।

(सू० ३५) तए णं सामहतिमहालिया मणूस-
परिसा समणस्स भगवओ महावीरस्स अंतिए धम्मं

सोच्चा णिसम्म हट्ठतुट्ठ जाव हियया उट्ठाए उट्ठेइ, २
त्ता समणं भगवं महावीरं तिकखुत्तो आयाहिणं
पयाहिणं करेइ २ ता वंदइ णमंसइ वंदित्ता णमं-
सित्ता कत्थेगइया मुन्डे भवित्ता अगाराओ अण-
गारियं पव्वइया, अत्थेगइया पंचाणुव्वइयं सत्तसि-
क्खावइयं दुवालसविहं गिहिधम्मं पडिवण्णा ॥

अवसेमा णं परिसा समणं भगवं महावीरं वंदइ
णमंसइ वंदित्ता णमंसित्ता एवं वयासी “ सुअ-
क्खाए ते भंते ! निग्गंथे पावयणे एवं सुपणत्ते
सुभासिए सुविणीए सुभाविए अणुत्तरे ते भंते !
निग्गंथे पावयणे, धम्मं णं आइक्खमाणा तुब्भे
उवसमं आइक्खह, उवसमं आइक्खमाणा विवेगं
आइक्खह, विवेगं आइक्खमाणा वेरमणं आइक्ख-
माणा अकरणं पावाणं कम्माणं आइक्खह, णत्थि
णं अरणे केइ समणे वा माहणे वा जे एरिसं धम्म-
माइक्खित्तए, किमंग पुण एत्तो उत्तरतरं ? ” एवं
वदित्ता जामेव दिसं पाउब्भूया तामेव दिसं पडि-
गया ॥

(सूत्र ३६) तए णं से कूणिए राया भंभसारपुत्ते
समणस्स भगवओ महावीरस्स अंतिए धम्मं सोच्चा

णिसम्महट्टतुट्ट जाव हियए उट्टेइ उट्टाए उट्टित्ता समणं
 भगवं महावीरं तिकखुत्तो आयाहिणं पयाहिणं
 करेइ २ त्ता वंदइ णमंसइ वंदित्ता णमंसित्ता एवं
 वयासी—“सुयक्खाए ते भंते ! निग्गन्थे पावयणे
 जाव किमंग पुण एत्तो उत्तरतरं ?,” एवं वदित्ता
 जामेव दिसं पाउब्भूए तामेव दिसं पडिगए ॥

(सू० ३७) तए णं ताओ सुभदापमुहाओ
 देवीओ समणस्स भगवओ महावीरस्स अंतिए
 धम्मं सोच्चा णिसम्महट्टतुट्ट जाव हिययाओ उट्टाए
 उट्टित्ता समणं भगवं महावीरं तिकखुत्तो
 आयाहिणं पयाहिणं करेति २ त्ता वंदंति णमंसंति
 वंदित्ता णमंसित्ता एवं वयासी—सुयक्खाए णं भंते !
 निग्गन्थे पावयणे जाव किमंग पुण एत्तो उत्तर-
 तरं ?,” एवं वदित्ता जामेव दिसिं पाउब्भूयाओ
 तामेव दिसिं पडिदयाओ ।

(समोसरणं समत्तां) ॥

(सू० ३८) तेणं कालेणं तेणं समएणं समस्स
 भगवओ महावीरस्स जेट्ठे अंतेवासी इंदभूर्इ णामं
 अणगारे गोयमगोत्तेणं सत्तुस्सैहे समचउरंससंठा-

णसंठिए वइरोसहणारायसंघयणे कणगपुलगणिय-
सपम्हगोरे उग्गतवे दित्ततवे तत्ततवे महातवे घोर
तवे उराले घोरे घोणुणे घोरतवस्सी घोरबंभचेर-
वासी उच्छूढसरीरे संखित्तविउलतेअलेस्से समण-
स्स भगवओ महावीरस्स अदूरसामंते उहुंजाणू
अहोसिरे भाणकोट्ठोवगए संजमेणं तवसा अप्पाणं
भावेमाणे विहरइ ।

तए णं सैं भगवं गोयमे जायसड्ढे जायसंसए
जायकोऊहल्ले उप्पणणसड्ढेउप्पणणसंसए उप्पणण-
कोऊहल्ले संजायसड्ढेसंजायसंसए संजायकोऊहल्ले
समुप्पणणसड्ढे समुप्पणणसंसएसमुप्पणणकोऊहल्ले
उट्ठाए उट्ठेइ उट्ठाए उट्ठित्ता जैणेव समणे भगवं
महावीरे तेणेव उवागच्छइ २ त्ता समणं भगवं
महावीरं तिकखुत्तो आयाहिणं पयाहिणं करेइ
तिकखुत्तोआयाहिणं पयाहिणंकरेत्ता वंदइ णमंसइ
वंदित्ता णमंसित्ता नच्चासण्णे नाइदूरे सुस्ससमाणे
णमंसमाणे अभि मुहेविण्णणं पंजलिउडे
पज्जुवासमाणे एवं वयासी ।

जीवे णं भंते ! असंजए अविरए अप्पडिहय-
पच्चक्खायपावकम्मे सकिरिए असंवुडे एगंतदंडे

एगंतबाले एगंतसुत्ते पावकम्मं अएहाइ ?-हंता
अएहाइ ॥ १ ॥

जीवे णं भंते ! असंजए जाव एगंतसुत्ते मोह-
णिज्जं पावकम्मं अएहाइ ? हंता अएहाइ ॥ २ ॥

जीवे णं भंते ! मोहणिज्जं कम्मं वेदेमाणे किं मो-
हणिज्जं कम्मं बंधइ ? वेयणिज्जं कम्मं बंधइ ? गोयमा !
मोहणिज्जंपि कम्मं बंधइ वेयणोज्जंपि कम्मं बंधइ,
णणत्थ चरिममोहणिज्जं कम्मं वेदेमाणे वेअणिज्जं
कम्मं बंधइ णो मोहणिज्जं कम्मं बंधइ ॥ ३ ॥

जीवे णं भंते ! असंजए जाव एगंतसुत्ते
ओसएण तसपाणघाई कालमासे कालं किच्चा
एरइएसु उववज्जइ ?, हंता उववज्जइ ॥ ४ ॥

जीवे णं भंते ! असंजए अविरए अप्पडिहय-
पच्चक्खायपावकम्मे इओ चुए पेच्चा देवे सिया ?
गोयमा ! अत्थेगइया देवे सिया अत्थेगइया णो
देवे सिया ॥

से केणट्ठेणं भंते ! एवं वुच्चइ-अत्थेगइया देवे
सिया अत्थेगइया णो देवे सिया ? गोयमा !, जे
इमे जीवा गामागरणयरणिगमरायहाणिखेडकब्बड-
मडंबदोणमुहपट्टणासमसंबाहसणिणवेसेसु अकाम-
तएहाए अकामबुहाए अकामबंभचरेवासेणं अकाम-

अरुहाणगसीयायवदंसमसगसेयजल्लमलपंकपरिता-
वेणं अप्पतरो वा भुज्जतरो वा कालं अप्पाणं परि-
किलेसंति अप्पतरो वा भुज्जतरो वा कालं अप्पाणं
परिकिलेसित्ता कालमासे कालं किच्चा अरुणयरेसु
वाणमंतरेसु देवलोएसु देवत्ताए उववत्तारो भवन्ति,
तहिं तेसिं गई तहिं तेसिं ठिई तहिं तेसिं उववाए
पणत्ते । तेसि णं भन्ते ! देवाणं केवइयं कालं ठिई
पणत्ता ? गोयमा ! दसवाससहस्साइं ठिई पणत्ता,
अत्थि णं भन्ते ! तेसिं देवाणं इड्ढी वा जुई
वा जसे इ वा बले इ वा वीरिए इ वा पुरिसक्का-
रिपरक्कमे इ वा ? हन्ता अत्थि । ते णं भन्ते ! देवा
परलोगस्सआराहगा ? णो इणट्ठे समट्ठे ॥ ५ ॥

से जे इमे गामागरणयरणिगमरायहाणिखे-
डकब्बडमडंबदोणमुहपट्टणागरसंबाहसणिणवेसेसु
मणुया भवन्ति, तं जहा—अंडुबद्धगा णिअलबद्धगा
हडिबद्धगा चारगबद्धगा हत्थच्चिणगा पायच्चिणगा
करणच्चिणगा एक्कच्चिणगा ओट्टच्चिणगा जिब्भ-
च्चिणगा सीसच्चिणगा मुखच्चिणगा मड्भच्चि-
णगा वेक्कच्चिणगा हियउ प्पाडियगा णयणु-
प्पाडियगा दसणुप्पाडियगा वसणुप्पाडियगा गेव-
च्चिणगा तंडुलच्चिणगा कागणिमंसक्खावियगा

ओलंबियगा लंबियगा घंसियगा घोलियगा फालिड-
 यगा पीलियगा सूलाइयगा सूलभिएणगा खारव-
 त्तिया वज्झवत्तिया सीहपुच्छियगा दवग्गिदड्ढगा
 पंकोसएणगा पंकेखुत्तगा वलयमयगा वसट्टमयगा
 णियाणमयगा अंतोसल्लमयगा गिरिपडियगा तरु-
 पडियगा मरुपडियगा गिरिपक्खंदोलिया तरुपक्खं-
 दोलिया मरुपक्खंदोलिया जलपवेसिगा जलणपवेसि-
 का विसंभक्खियगा सत्थोवाडियगा वेहाणसिया गि-
 द्दपट्टगा कंतारमयगा दुब्भिक्खमयगा असंकिलिट्ठप-
 रिणामाते कालमासे कालं किच्चा अणयरेसु वाण-
 मंतरेसु देवलोएसु देवत्ताए उववत्तारो भवन्ति, तहिं
 तेसिं गई तहिं तेसिं ठिई तहिं तेसिं उववाए
 पणत्ते । तेसि णं भंते ! देवाणं केवइयं कालं
 ठिई पणत्ता ? गोयमा ! बारसवाससहस्साइं ठिई
 पणत्ता अत्थि णं भंते ! तेसिं देवाणं इड्ढी
 वा जुई वा जसे इ वा बले इ वावीरिए इ वा
 पुरिसक्कारपरिक्कमे इ वा ? हंता अत्थि । ते णं भंते !
 देवा परलोगस्सआराहगा ? णो इणट्ठे समट्ठे ॥ ६ ॥

से जै इमे गामगर जाव संनिवेसेसु मणुया
 भवन्ति तं जहा-पगइभइगा पगइउवसंता पगइप-
 तणुकोहमाणमायालोहा मिउमइवसंपण्णा अल्लिणा

[] विणीया अम्मापिउसुस्सूसगा अम्मापिईणं
अणइक्कमणिज्जवयणा अप्पिच्छा अप्पारंभा अप्परि-
ग्गहा अप्पेणं आरंभेणं अप्पेणं समारंभेणं अप्पेणं
आरंभसमारंभेणं वित्तिं कप्पेमाणा बहूइं वासाइं
आउयं पालंति पालित्ता कालमासे कालं किच्चा
अण्णयरेसु वाणतंरेसु तं चेव सव्वं णवरं ठिई
चउदसवाससहस्साइं [देवा परलोगस्सआराहगा ?
णो इणट्ठे समट्ठे] ॥ ७ ॥

से जाओ इमाओ गामागर जाव संनिवेसेसु
इत्थियाओ भवन्ति, तं जहा-अंतोअंतेउरियाओ
गयपइयाओ मयपइयाओ बालविहवाओ छडिय-
ल्लियाओ माइरक्खियाओ पियरक्खियाओ भायर-
क्खियाओ [] कुलघररक्खियाओ ससुरकुलर-
क्खियाओ [] परूढणहमंसकेसकक्खरोमाओ
ववगयपुप्फगंधमल्लालंकाराओ अण्हाणगसेयजल्ल-
मलपंकपरितावियाओ ववगयखीरदहिणवणीयस-
प्पितेल्लगुललोणमहुमज्जमंसपरिचत्तकयाहाराओ
अप्पिच्छाओ अप्पारंभाओ अप्पपरिग्गहाओ अप्पेणं
आरंभेणं अप्पेणं समारंभेणं अप्पेणं आरंभसमा-
यंभेणं वित्तिं कप्पेमाणीओ अकामबंभचेरवासैणं
तामेव पइसेज्जं णाइक्कमइ ताओ णं इत्थियाओ

एयारूवेणं विहारेणं विहरमाणीओ बहूइं वासाइं
सेसं तं चेव जाव चउसइं वाससहस्साइं ठिई
पणत्ता ॥ ८ ॥

से जे इमे गामागर जाव सन्निवेसेसु मणुया
भवन्ति, तं जहा-दगबिइया दगतइया दगसत्तमा
दगएक्कारसमागोयमा गोव्वइया गिहिधम्मा धम्मचिं-
तगा अविरुद्धविरुद्धबुद्धसावगप्पभित्तयो तेसिं मणु-
याणं णो कप्पइ इमाओ नव रसविगईओ
आहारेत्तए, तं जहा-खीरं दहिं णवणीयं सप्पिं
तेल्लं फाणियं महुं मज्जं मंसं, णो एणणत्थ एक्काए
सरिसवविगईए, ते णं मणुया अप्पिच्छा तं चेव
सव्वं णवरं चउरासीस वाससहस्साइं ठिई पण-
त्ता ॥ ९ ॥

से जे इमे गंगाकूलगा वाणपत्था तावसा भवन्ति,
तं जहा-होत्तिया पोत्तिया कोत्तिया जणइं सड्ढई
थालई हुंपउट्ठा दंतुक्खलिया उम्मज्जगा सम्मज्जगा
निमज्जगा संपक्खाला दक्खिणकूला उत्तरकूलगा
संखधमगा कूलधमगा मिगलुद्धगा हत्थितावसा
उइंडगा दिसापोकखिणो वाकवासिणो अंबुवासिणो
बिलवासिणो जलवासिणो वेलवासिणो रुक्खमू-
लिया अंबुभक्खिणो वाउभक्खिणो सेवालभक्खि-

णो मूलाहारा कंदाहारा तथाहारा पत्ताहारा पुष्पा-
हारा बीयाहारा परिसडियकंदमूलतयपत्तपुष्कफ-
लाहारा जलाभिसेयकठिणगायभूया आयावणाहिं
पंचगितावेहिं इंगालसोल्लियं कण्डुसोल्लियं कट्ट-
सोल्लियं पिव अप्पाणं करेमाणा बहूइं वासाइं परि-
यागं पाउणंति, २ त्ता कालमासे कालं किच्चा उक्को-
सेणं जोइसिएसु देवेसु देवत्ताए उववत्तारो भवंति ।
पलिओवमं वाससयसहस्समब्भहियं ठिईं सेसं
तं चेव (—आराहगा ?—णो इणट्ठे समट्ठे) ॥१०॥

से जे इमे जाव मन्निवेसेसु पव्वइया समणा
भवन्ति । तं जहा—कंदप्पिया कुकुइया मोहरिया
गीयरइप्पिया नच्चणसोला, ते णं एएणं विहारेणं
विहरमाणा बहूइं वासाइं सामण्णपरियायं पाउणंति,
२ त्ता तस्स ठाणस्स अणालोइयपडिक्कंता कालमासे
कालं किच्चा उक्कोसेणं मोहम्मो कप्पे कंदप्पिएसु
देवेसु देवत्ताए उववत्तारो भवंति । तेहिं तेसिं गई,
सेसं तं चेव णवरं पलिओवमं वाससयसहस्सम-
ब्भहियं ठिईं ॥ ११ ॥

से जे इमे जाव सन्निवेसेसु परिव्वाया भवन्ति ।
तं जहाइंखा— जोगी काविला भिउव्वा हंसा
परमहंसा बहुउदगा कुडिक्कया कण्हपरिव्वायया ।

तत्थ खलु इमे अट्ठ माहणपरिच्चायया भवन्ति ।
तंजहा—

करणे य करकण्ठे य अंबडे य परासरे ।

करणे दीवायणे चेव देवगुत्ते य नारए (१)॥

तत्थ खलु इमे अट्ठ खत्तिय-परिच्चायया भवन्ति ।
तं जहा—

सीलई ससिहारे (य) नग्गई भग्गई ति य ।

विदेहे राया रायारामे बले ति य ॥

ते णं परिच्चायया रिउवेदयजुवेदसामवेय
अहव्वणवेयइतिहासपंचमाणं णिघण्डुच्छ्राणं संगो-
वंगाणं सरहस्साणं चउएहं वेयाणं सारगा पारगा
धारगा वारगा सउंगवी सट्ठितंतविसारया संखाणे
सिक्खाकप्पे वागरणे छंदे निरुत्ते जोइसामयणे
अण्णेषु य [बहूसु] बंभरणएसु य सत्थेसु सुपरि-
णिट्ठिया यावि होत्था ।

ते णं परिच्चायया दाणधम्मं च सोयधम्मं च
तित्थाभिसेयं च आघवेमाणा पणवेमाण पखवेमाणा
विहरन्ति । 'जरुणं अम्हं किं चि अमुई भवइ तएणं
उदएण य मट्ठियाए च पक्खालियं सुई भवइ । एवं
खलु अम्हे चोक्खा चोक्खायारा सुई सुइसमायारा

भवित्ता अभिसेयजलपूयप्पाणो अविघ्घेणं सग्गं गमिस्सामो' ।

तेसि णं परिव्वायागाणं णो कप्पइ अगडं वा तलायं वा णइं वा वाविं वा पुक्खरिणिं वा दीहियं वा गुंजालियं वा सरं वा [कचित्-सरसिं वा] सागरं वा ओगाहित्तए णणत्थ अद्धाणगमणेणं । णो कप्पइ सगडं वा जाव संदमाणियं वा दुरुहित्ता णं गच्छित्तए । तेसि णं परिव्वायगाणं णो कप्पइ आसं वा हत्थिं वा उट्ठं वा गोणिं वा महिसं वा खरं वा दुरुहित्ता णं गमित्तए [णणत्थ बलाभि-ओगेणं ।] तेसि णं परिव्वायगाणं णो कप्पइ नड-पेच्छा इ वा जाव मागहपेच्छा इ वा पेच्छित्तए । तेसिं परिव्वायगाणं णो कप्पइ हरियाणं लेसणया वा घट्टणया वा थंभणया वा लूसणया वा उप्पाड-णया वा करित्तए, तेसिं परिव्वायगाणं णो कप्पइ इत्थिकहा इ वा भत्तकहा इ वा देसकहा इ वा रायकहा इ वा चोरकहा इ वा जणवयकहा इ वा अणत्थदंडं करित्तए । तेसि णं परिव्वायगाणं णो कप्पइ अयपायाणि वा तउअपायाणि वा तंबपायाणि वा जसदपायाणि वा सीसगपायाणि वा रूपपा-याणिवा सुवणणपायाणि वा अण्णयराणि वा बहु-

मुल्लाणि धारित्तए, णणत्थ लाउपाएण वा दारुपाएण वा मट्टियापाएण वा । तेसि णं परिब्बायगाणं णो कप्पइ अयबंधणाणि वा तउअपबंधणाणि वा तंबवधणाणि वा जाव बहुमुल्लाणि धारित्तए । तेसि णं परिब्बायगाणं णो कप्पइ णाणाविहवरणरागरत्ताइं वत्थाइं धारित्तए, णणत्थ एगाए धाउरत्ताए । तेसि णं परिब्बायगाणं णो कप्पइ हारं वा अद्धहारं वा एगावलिं वा मुत्तावलिं वा कणावलिं वा रयणावलिं वा मुरविं वा कंठमुरविं वा पालंबं वा तिसरयं वा कडिसुत्तं वा दसमुद्धिआणतगं वा कडयाणि वा तुडियाणि वा अंगयाणि वा केऊराणि वा कुंडलाणि वा मउडं वा चूलामणिं वा पिणद्धित्तए, णणत्थ एगेणं तंबिएणं पवित्तएणं । तेसि णं परिब्बायगाणं णो कप्पइ गंधिमवेढिमपूरिमसंघाइमे चउव्विहे मल्ले धारित्तए, णणत्थ एगेणं कणपूरेणं । तेसि णं परिब्बायगाणं णो कप्पइ अगलुएण वा चंदणेण वा कुंकुमेण वा गायं अणुलिंपित्तए, णणत्थ एक्काए गंगामट्टियाए ।

तेसि णं परिब्बायगाणं कप्पइ मागहए पत्थए जलस्स पडिग्गाहित्तए सेऽवि व वहमाणे णो चेव णं अवहमाणे, सेऽवि य धिमिओदए णो चेव णं

कहमोदए, सेऽवि य बहुप्पसण्णे णो चेव एं अबहु-
प्पसण्णे, सेऽवि य परिपूए णो चेव णं अपरिपूए
सेऽवि य णं दिण्णे णो चेव णं अदिण्णे, सेऽवि य
विवित्तए णो चेव णं हत्थपायचरुचमसपक्खाल-
णट्ठाए सिणाइत्तए वा । तेसि णं परिव्वायगाणं
कप्पइ मागहए आद्धादए जलस्स पडिग्गाहित्तए,
सेऽवि य वहमाणे णो चव एं अवहमाणे जाव णो
चेवणं अदिण्णे, सेऽवि य हत्थपायचरुचमसपक्खाल-
णट्ठयाए णो चेव णं पिबित्तए सिणाइत्तए वा ।

ते णं परिव्वायगा एयारूवेणं विहारेणं विहर-
माणा बहूइं वासाइं परियायं पाउणंति, २ त्ता
कालमासे कालं किच्चा उक्कोसेणं बंभलोए कप्पे
देवत्ताए उववत्तारो भवंति, तहिं तेसिं गई तहिं
तेसिं ठिई दस सागरोवमाइं ठिई पणत्ता, सेसं
तं चेव ॥१२॥

(सूत्र ३६) तेणं कालेणं तेणं समएणं अम्म-
डस्स परिव्वायगस्स सत्त अंतेवासिसयाइं गिम्ह-
कालसमयंसि जेट्ठामूलमासंमि गंगाए महानईए
उभओकूलेणं कंवल्लपुराओ णयराओ पुरिमतालं
णयरं संपट्ठिया विहाराए ।

तए णं तेसिं परिव्वायगाणं तीसे अगामियाए
 छिण्णोवायाए दीहमद्धाए अडवीए कंचि देसंतर-
 मणुपत्ताणं से पुव्वग्गहिए उदए अणुपुव्वेणं परि-
 भुंजमाणे भीणे ।

तए णं ते परिव्वाया भीणोदगा समाणा
 तएहाए पारब्भमाणा २ उदगदातारमपस्समाणा
 अणमणं सहावेति सहावि ता एवं वयासीः—

“एवं खलु देवाणुप्पिया ! अम्ह इमीसे अगा-
 मिआए जाव अडवीए कंचि देसंतरमणुपत्ताणं से
 उदए जाव भीणे तं सेयं खलु देवाणुप्पिया ! अम्ह
 इमीसे अगामियाए जाव अडवीए उदगदातारस्स
 सव्वओ समंता मग्गणगवेसणं करित्तए” त्ति
 कट्ठु अणमणस्स अंतिए एयमट्ठं पडिसुणँति २
 ता तीसे अगामियाए जाव अडवीए उदगदाता-
 रस्स सव्वओ समंता मग्गणगवेसणं करेई करित्ता
 उदगदातारमलभमाणा दोच्चंपि अणमणं सहा-
 वेन्ति सहावेत्ता एवं वयासीः—

“इह णं देवाणुप्पिया ! उदगदातारो णत्थि
 तं णो खलु कप्पइ अम्ह अदिणं गिरिहत्तए []
 अदिणं साइज्जित्तए, तं मा णं अम्हे इयाणिं आव-
 इकालं पि अदिणं गिरहामो अदिणं साइज्जामो

मा णं अम्हं तवलोवे भविस्सइ । तं सेयं खलु
अम्हं देवाणुप्पिया ? तिदंडयं कुंडियाओ य
कंचणियाओ य करोडियाओ य भिसियाओय
छणालए य अंकुसए य केसरियाओ य पवित्तए
य गणेतियाओ य छत्तए बाहणाओ य पाउयाओ
य धाउरत्ताओ य एगंते एडित्ता गंगं महाणइं ओगा-
हित्ता वालुयासंथारए संथरित्ता संलेहणाभूसियाणं
भत्तपाणपडियाइक्खियाणं पाओवगयाणं कालं
अण्वकंखमाणाणं विहरित्तए त्तिकट्ठु अणम-
णस्स अंतिए एयमट्ठं पडिमुणेंति, २ त्ता तिदंडए
य जाव एगंते एडेइ २ त्ता गंगं महाणइं ओगा-
इइ २ त्ता वालुआसंथारए संथरंति २ त्ता वालु-
यासंथारयंदुरहिंति वा २ त्ता पुरत्थाभिमुहा संपलियं-
कनिसएणा करयल जाव कट्ठु एवं वयासी ।

“नमोऽत्थु णं अरहंताणं जाव संपत्ताणं, नमो
ऽत्थु णं समणस्स भगवओमहावीरस्स जाव संपा-
विउकामस्स, नमोऽत्थुणं अम्मडस्स परिव्वायगस्स
अम्हं धम्मायरियस्स धम्मोवदेसगस्स । पुर्व्वि णं
अम्हे [] अम्मडस्स परिव्वायगस्स अंतिए थूल-
गपाणाइवाए पच्चक्खाए जावज्जीवाए थुलए मुसा-
वाए थुलए अदिण्णादाणे पच्चक्खाए जावज्जीवाए,

सव्वे मेहुणे पच्चक्खाए जावज्जीवाए, थूलए परिग्गहे
 पच्चक्खाए जावज्जीवाए, इयाणिं अम्हे समणस्स
 भगवओ महावीरस्स अंतिए सव्वं पाणाइवायं पच्च-
 क्खामो जावज्जीवाए, एवं जाव सव्वं परिग्गहं
 पच्चक्खामो जावज्जीवाए, सव्वं कोहं माणं मायं
 लोहं पेज्जं दोसं कलहं अब्भक्खाणं पेसुणं परप-
 रिवायं अरइरइं मायांमोसं मिच्छादंसणसल्लं अक-
 रणिज्जं जोगं पच्चक्खामो जावजीवाए, सव्वं असणं
 पाणं खाइमं साइमं चउव्विहं पि आहारं पच्चक्खामो
 जावज्जीवाए । जं पि य इमं सरीरं इट्ठं कंतं पियं
 मणुणं मणामं [पेज्जं] थेज्जं वेसासियं संमयं बहुमयं
 अणुमयं भंडकरंडगसमाणं मा णं सीयं मा णं उल्लहं
 मा णं खुहा मा णं पिवासा मा णं वाला मा णं
 चोरा मा णं दंसा मा णं मसगा मा णं वाइयपि-
 त्तिथि [] संमिवाइयविविहा रोगायंका परीसहो-
 वसग्गा फुसंतु त्तिकट्ठु एयंपि णं चरमेहिं ऊसास-
 णीसासेहिं वोसिरामि त्तिकट्ठु संलेहणाभूसणा-
 भूसिया भत्तपाणपडियाइक्खिया पाओवगया कालं
 अणवकंखमाणा विहरंति ।

तए णं ते परिव्वाया बहूइं भत्ताइं अणसणाए
 छेदेन्ति छेदित्ता आलोइयपडिक्कंता समाहिपत्ता

कालमासे कालं किच्चा बंभलोए कप्पे देवत्ताए उव-
बण्णा । तहिं तेसिं गई दससागरोवमाइं ठिई
पणत्ता, परलोगस्स आराहगा, सेसं तं चेव ॥१३॥

(सू० ४०) बहुजणे णं भंते ! अणमणस्स
एवमाइक्खइ एवं भासइ एवं परूवेइ । “एवं खलु
अंबडे परिव्वायए कंपिल्लपुरे णयरे घरसए आहा-
रमाहरेइ, घरसए वसहिं उवेइ, से कहमेयं भंते !
एवं ?” ।

“गोयमा ! जं णं से बहुजणो अणमणस्स
एवमाइक्खइ जाव एवं परूवेइ—“एवं खलु अम्मडे
परिव्वायए कंपिल्लपुरे जाव घरसए वसहिं उवेइ,
सच्चे णं एसमट्ठे, अहंपि णं गोयमा ! एवमाइक्खामि
जाव एवं परूवेमि ‘एवं खलु अम्मडे परिव्वायए
जाव वसहिं उवेइ” ।

से केणट्ठेणं भंते ! एवं बुच्चइ—अम्मडे परिव्वा-
यए जाव वसहिं उवेइ ?

“गोयमा ! अम्मडस्स णं परिव्वायगस्स पगइ-
भइयाए जाव विणीययाए छट्ठंछट्ठेणं अनिक्खित्तेणं
तवोकम्मेणं उड्ढं बाहाओ पगिज्झिय २ सूराभि-
सुहस्स आयावणभूमीए आयावेमाणस्स सुभेणं
परिणामेणं [] पसत्थाहिं लेसाहिं विसुज्झमा-

णीहिं अन्नया कयाइ तदावरणिज्जाणं कम्माणं खओ-
वसमेणं ईहावूहामग्गणगवेसणं करेमाणस्स वीरि-
यलद्धीए वेउव्वियलद्धीए ओहिणाणलद्धीए समुप्प-
ण्णातएणं से अम्मडे परिव्वायए ताए वीरियल-
द्धीए वेउव्वियलद्धीए ओहिणाणलद्धी समुप्पण्णाए
जणविम्हावणहेउं कंपिल्लपुरे णगरे घरसए जाव वसहिं
उवेइ, से तेणट्ठेणं गोयमा ! एवं वुच्चई-अम्मडे परि-
व्वायए कंपिल्लपुरे णगरे घरसए जाव वसहिं उवेइ ।

पहू णं भंते ! अम्मडे परिव्वायए देवाणुप्पि-
याणं अंतिए मुंडे भवित्ता अगाराओ अणगारियं
पव्वइत्तए ?

णो इणट्ठे समट्ठे, गोयमा ! अम्मडे णं परिव्वा-
यए समणोवासए अभिगयजीवाजीवे जाव अप्पाणं
भावेमाणे विहरइ, णवरं ऊसियफलिहे अवंगुयदु-
वारे चियत्तंतेउरघरदारपवेसी [] एयं ण वुच्चइ ।

अम्मडस्स णं परिव्वायगस्स थूलए पाणाइवाए
पच्चक्खाए जावज्जीवाए जाव परिग्गहे णवरं सव्वे
मेहुणे पच्चक्खाए जावज्जीवाए ।

अम्मडस्स णं [परिव्वायगस्स] णो कप्पइ
अक्खसोयप्पमाणमेत्तंपि जलं सयराहं उत्तरित्तए,
णरणत्थ अद्धानगमणेणं । अम्मडस्स णं णो कप्पइ

सगडं वा एवं तं चेव भाणियव्वं जाव णणत्थ
एगाए गंगामट्टियाए । अम्मडस्स णं परिव्वायगस्स
णो कप्पइ आहाकम्मिए वा उद्देसिए वा मीसजाए
इ वा अज्झोयरए इ वा पूइकम्मे इ वा कीयगडे इ
वा पामिच्चे इ वा अणिसिट्ठे इ वा अभिहडे इ वा
ठइत्तए वा रइत्तए वा कंतारभत्ते इवा दुब्भिकख-
भत्ते इ वा पाहुणगभत्ते इ वा गिलाणभत्ते इ वा
वद्दलियाभत्ते इ वा भोत्तए वा पाइत्तए वा, अम्म
डस्स णं परिव्वायगस्स णो कप्पइ मूलभोयणे वा
जाव बीयभोयणे वा भोत्तए वा पाइत्तए वा ।

अम्मडस्स णं परिव्वायगस्स चउव्विहे अणट्ठा-
दंडे पच्चक्खाए जावज्जीवाए । तं जहाः—अवज्झा-
णायरिए पमायायरिए हिंसप्पयाणे पावकम्मोवा-
एसे ।

अम्मडस्स कप्पइ मागहए अट्ठाढए जलस्स
पडिग्गाहित्तए सेऽविय वहमाणए णो चेव णं
अवहमाणए जाव सेऽविय परिपूए णो चेव णं
अपरिपूए, सेऽविय सावज्जेत्तिफाजं णो चेव णं
अणवज्जे, सेऽविय जीवा इतिकट्ठु णो चेव णं
अजीवा सेऽविय दिण्णे णो चेव णं अदिण्णे से-
ऽविय दंतहत्थपायचरुचमसपक्खालणट्ठयाए पिबि-

त्तए वा णो चेव णं सिणाइत्तए । अम्मडस्स कप्पइ
मागहए य आढए जलस्स पडिगाहित्तए, सेऽवि-
य वहमाणए जाव दिन्ने णो चेव णं अदिण्णे, सेऽवि-
य सिणाइत्तए णो चेव णं हत्थपायचरुचमसपक्खा-
लणट्ठयाए पिवित्तए वा ।

अम्मडस्स णो कप्पइ अरणउत्थिया वा अरण-
उत्थियदेवयाणि वा अरणउत्थियपरिग्गहियाणि वा
चेइयाइं वंदित्तए वा णमंसित्तए वा जाव पज्जुवा-
सित्तए वा, णरणत्थ अरिहंते वा अरिहंतचेइयाइं वा ।

अम्मडे णं भंते ! परिव्वायए कालमासे कालं
किच्चा कहिं गच्छिहिति ? कहिं उववज्जिहिति ?
गोयमा ! अम्मडे णं परिव्वायए उच्चावएहिं सील-
व्वयगुणवेरमणपच्चक्खाणपोसहोववासेहिं अप्पाणं
भावेमाणे बहूइं वासाइं समणोवासयपरियायं
पाऊणिहिति, २ त्ता मासियाए संलेहणाए अप्पाणं
भूसित्ता सट्ठिं भत्ताइं अणसणाए छेदित्ता आलो-
इयपडिक्कंते समाहिपत्ते कालमासे कालं किच्चा
बंभलोए कप्पे देवत्ताए उववज्जिहिति । तत्थ णं
अत्थेगइयाणं देवाणं दस सागरोवमाइं ठिई
पणत्ता । तत्थ णं अम्मडस्स वि देवस्स दस
सागरोवमाइं ठिई ।

से णं भंते ! अम्मडे देवे ताओ देवलोगाओ
आउक्खएणं भवक्खएणं ठिइक्खएणं अणंतरं चयं
चइत्ता कहिं गच्छिहिति कहिं उववज्जिहिति ?

गोयमा ! महाविदेहे वासे जाइं कुलाइं भवंति
अड्ढाइं दित्ताइं वित्ताइं विच्छिण्णविउलभवण-
सयणासणजाणवाहणाइं बहुधणजायरुवरययाइं
आओगपओगसंपउत्ताइं विच्छड्डियपउरभत्तपाणाइं
बहुदासीदासगोमहिसगवेलगप्पभूयाइं बहुजणस्स
अपरिभूयाइं तहप्पगारेसु कुलेसु पुमत्ताए
पच्चायाहिति ।

तएणं तस्स दारगस्स गढभत्थस्स चेव समा-
णस्स अम्मापिईणं धम्मे दढा पइण्णा भविस्सइ ।

से णं तत्थ णवण्हं मासाणं बहुपडिपुण्णाणं
अद्धट्ठमाणराइंदियाणंवीइक्कंताणं सुकुमालपाणिपाए
जाव ससिसोमाकारे कंते पियदंसणे सुरुवे दारए
पयाहिति ।

तए णं तस्स दारगस्स अम्मापियरो षढमे
दिवसे ठियवडियं काहिति, बिइयदिवसे चंदसूर-
दंसणियं काहिति, छट्ठे दिवसे जागरियं काहिति,
एक्कारसमे दिवसे वीइक्कंते णिव्वित्ते असुइजायक-
म्मकरणे संपत्ते बारसाहे दिवसे अम्मापियरो इमं

एयारूवं गोणं गुणणिप्फणं णामधेज्जं काहिंति—
 “जम्हा णं अम्हं इमंसि दारगंसि गढ्भत्थंसि चेव
 समाणंसि धम्मे दढपइण्णा तं होउ णं अम्हं दारए
 दढपइण्णे णामेणं” तए णं तस्स दारगस्स अम्मा-
 पिघरो णामधेज्जं करेहिंति दढपइण्णेत्ति ।

[] तं दढपइण्णं दारगं अम्मापिघरो साइरे-
 गढ्वासजायगं जाणित्ता सोभणंसि तिहिकरण
 [दिवस] णक्खत्तमुहुत्तंसि कलायरियस्स
 उवणेहिंति ।

तए णं से कलायरिए तं दढपइण्णं दारगं
 लेहाइयाओ गणियप्पहाणाओ सउणरूपज्जवसा-
 णाओ बावत्तरिकलाओ सुत्तओ य अत्थओ य
 करणओ य हाविहिंति सिक्खाविहिंति, तं
 जहा—लेहं गणियं रूवं णट्ठं गीयं वाइयं सरगयं
 पुक्खरगयं समतालं जूयं जणवायं पासगं अट्ठावयं
 पोरेकच्चं दगमट्ठियं अण्णविहिं [पाणविहिं
 वत्थविहिं विलेवणविहिं] सयणविहिं अज्जं
 पलेलियं मागहियं गाहं गीइयं सिलोयं हिरण्ण-
 जुत्तिं सुवण्णजुत्तिं गंधजुत्तिं चुण्णजुत्तिं आभरण-
 विहिं तरुणीपडिकम्मं इत्थिलक्खणं पुरिसल-
 क्खणं हयलक्खणं गयलक्खणं गोणलक्खणं कुक्कु-

डलकखणं चकलकखणं छतलकखणं चम्मलकखणं
दंडलकखणं असिलकखणं मणिलकखणं काकणि-
लकखणं वत्थुविज्जं खंधारमाणं नगरमाणं वत्थुनि-
वेसणं [] वूहं पडिवूहं चारं पडिचारं चक्कवूहं
गरुलवूहं सगडवूहं जुद्धं निजुद्धं जुद्धाइजुद्धं
मुट्टिजुद्धं बाहुजुद्धं लयाजुद्धं ईसत्थं छरुप्पवाहं
धणुव्वेयं हिरण्णपागं सुवण्णपागं [] वट्टखेड्डं
सुत्तखेड्डं णालियाखेड्डं पत्ताच्छेज्जं कडगच्छेज्जं
सज्जीवं निज्जीवं सउण्णरुयमिति बावत्तरिकलाओ
सेहावित्ता सिक्खावेत्ता अम्मापिईणं उवणेहिति ।

तए णं तस्स दढपइण्णस्स दारगस्स अम्मापियरो
तं कलायरियं विउलेणं असणपाणखाइमसाइमेणं
वत्थगंधमल्लालंकारेण य सक्कारेहिंति सम्माणेहिंति
२ त्ता विउल जीवियारिहं पीइदाणं दलइस्संति, २
त्ता पडिविसज्जेहिंति ।

तए णं से दढपइण्णे दारए बावत्तरिकलापंडिए
नवंगसुत्तपडिबोहिए अट्टारसदेसीभासाविसारए
गीयरई गंधव्वणट्टकुसले हयजोही गयजोही
रहजोही बाहुजोही बाहुप्पमही वियालचारी साह-
सिए अलंभोगसमत्थे यावि भविस्सइ ।

तए णं दढपइण्णं दारगं अम्मापियरो बावत्त-

रिकलापंडियं जाव अलंभोगसमत्थं वियाणित्ता
विउलेहिं अण्णभोगेहिं पाणभोगेहिं लेणभो-
गेहिं वत्थभोगेहिं सयणभोगेहिं कामभोगेहिं
उवणिमंतेहिंति ।

तए णं से दढपइण्णे दारए तेहिं विउलेहिं
अण्णभोगेहिं जाव सयणभोगेहिं णो सज्जिहिति
णो रज्जिहिति णो गिज्झिहिति णो मुज्झिहिति
णो अज्झोववज्जिहिति ।

से जहा णामए उप्पले इ वा पउमे इ वा
कुसुमे इ वा नलिणे इ वा सुभगे इ वा सुगंधे इ
वा पोंडरीए इ वा महापोंडरीए इ वा सयपत्ते इ वा
सहस्सपत्ते इ वा सयसहस्सपत्ते इ वा पंके जाए
जले संवुड्ढे णोवलिप्पइ पंकरणं णोवलिप्पइ
जलरण, एवामेव दढपइण्णे वि दारए कामेहिं
जाए भोगेहिं संवुड्ढे णोवलिप्पिहिति कामरणं
णोवलिप्पिहिति भोगरणं णोवलिप्पिहिति मित्त-
णाइणियगसयणसंबंधिपरिजणेणं ।

से णं तहारूवाणं थेराणं अंतिए केवल
बोहिं बुज्झिहिति २ त्ता अगाराओ अणगारियं
पव्वइहिति ।

सेणं भविस्सइ अणगारे भगवंते ईरियासमिए
जाव गुत्तवंभयारी ।

तस्स णं भगवंतस्स एएणं विहारेणं विहरमा-
णस्स अणंते अणुत्तरे णिवाघाए निरावरणे कसिणे
पडिपुण्णे केवलवरणाणदंसणे समुप्पज्जहिति ।

[] तए णं से दढपइण्णे केवली बहूइं वासाइं
केवलिपरियागं पाउणिहिति पाउणिहि त्ता मासियाए
संलेहणाए अप्पाणं भूसित्ता सट्ठिं भत्ताइं अण-
सणाए छेदित्ता जस्सट्ठाए कीरइ एग्गभावे मुंडभावे
अण्हाणए अदंतवणए केसलोए बंभचेरवासे अच्छ-
त्तगं अणोवाहणगं भूमिसेज्जा फलहसेज्जा कट्टसेज्जा
परघरपवेसो लद्धावलद्धं वित्तीए माणावमाणणाओ
परेहिं हीलणाओ खिसणाओ निंदणाओ मरह-
णाओ तालणाओ तज्जणाओ परिभवणाओ पव्व-
हणाओ उच्चावया गामकंटगा बावीसं परीसहोव-
सग्गा अहियासिज्जंति तमट्टमाराहित्ता चरिमेहिं
उस्सासणिस्सासेहिं सिज्झिहिति बुज्झिहिति
मुच्चिहिति परिणिवा हिति सब्बदुक्खाणमंतं
करेहिति ॥ १४ ॥

(सू० ४१) सेज्जे इमे गामागर जाव सणि-
वेसेसु पव्वइया समणा भवंति, तं जहाः—आय-

रियपडिणीया उवज्झायपडिणीया कुलपडिणीया
 गणपडिणीया आयरियउवज्झायाणं अयसकारगा
 अवण्णकारगा अकित्तिकारगा बहूहिं असब्भावु-
 ब्भावणाहिं मिच्छत्ताभिणिवेसेहि य अप्पाणं च
 परं च तदुभयं च वुग्गाहेमाणा वुप्पाएमाणा विह-
 रित्ता बहूइं वासाइं सामण्णपरियागं पाउणंति-
 पाउणि त्ता तस्स ठाणस्स अणालोइयअप्पडिक्कंता
 कालमासे कालं किञ्चा उक्कोसेणं लंतए कप्पे
 देवकिब्बिसिएसु देवकिब्बिसियत्ताए उववत्तारो
 भवंति, तहिं तेसिं गई, तेरस सागरोवमाइं ठिई,
 अणाराहगा, सेसं तं चेव ॥ १५ ॥

सेज्जे इमे सण्णपंचिंदियतिरिक्खजोणिया
 पज्जत्तया भवंति, तं जहाः—जलयरा थलयरा खह-
 यरा तेसि णं अत्थेगइयाणं सुभेणं परिणामेणं पस-
 त्थेहिं अज्झवसाणेहिं लेस्साहिं विमुज्झमाणीहिं
 तयावरणिज्जाणं कम्माणं खओवसमेणं ईहापोह-
 मग्गणगवेसणं करेमाणाणं सण्णीपुव्वजाईसरणे
 समुप्पज्जई ।

तए णं ते समुप्पण्णजाइसरा समाणा सयमेव
 पंचाणुव्वयाइं पडिज्जंति पडिवज्जि त्ता बहूहिं सीलव्व-
 यगुणवेरमणपच्चक्खाणपोसहोववासेहिं ।]

अप्पाणं भावेमाणा बहूइं वासाइं आउयं पालेंति
पालि ता भत्तं पच्चक्खंति बहूइं भत्ताइं अणसणाए
छेयंति छेइ ता आलोइयपडिक्कंता समाहिपत्ता काल-
मासे कालं किच्चा उक्कोसेणं सहस्सारे कप्पे
देवत्ताए उववत्तारो भवंति, तहिं तेसिं गई,
अट्टारस सागरोवमाइं ठिई पणत्ता परलोगस्स
आराहगा, सेसं तं चेव ॥ १६ ॥

से जे इमे गामागर जाव संनिवेसेसु आजो-
विया भवंति, तं जहा—दुघरंतरिया तिघरंतरिया
सत्तघरंतरिया उप्पलबेंटिया घरसमुदाणिया विज्जु-
यंतरिया उट्टियासमणा, ते णं एयारूवेणं विहारेणं
विहरमाणा बहूइं वासाइं परियायं पाउणित्ता काल-
मासे कालं किच्चा उक्कोसेणं अच्चुए कप्पे देवत्ताए
उववत्तारो भवंति, तेहिं तेसिं गई बावीसं सागरो-
वमाइं ठिई, अणाराहगा, सेसं तं चेव ॥ १७ ॥

सेज्जे इमे गामागर जाव सण्णिवेसेसु
पव्वइया समणा भवंति; तं जहा—अत्तुक्को-
सिया परपरिवाइया भूइकम्मिया भुज्जो भुज्जो
कोउयकारगा, ते णं एयारूवेणं विहारेणं विह-
रमाणा बहूइं वासाइं सामण्णपरियागं पाउणंति

२ त्ता तस्स ठाणस्स अणालोइयपडिक्कंता काल-
मासे कालं किच्चा उक्कोसेणं अच्चुए कप्पे आभि-
ओगिएसु देवेसु देवत्ताए उववत्तारो भवन्ति, तेहिं
तेसिं गई बावीसं सागरोवमाइं ठिई परलोगस्स
अणाराहगा, सेसं तं चेव ॥ १८ ॥

सेज्जे इमे गामागर जाव सणिएवेसेसु णि-
एहगा भवन्ति, तं जहा-१ बहुरया २ जीवपएसिया
३ अव्वत्तिया ४ साम्मुच्छेइया ५ दोकिरिया ६
तेरासिया ७ अबद्धिया इच्चेते सत्त पवयणणिएहगा
केवललंचरियालिंगसामणणा मिच्छदिट्ठी बहूहिं
असव्भावुवभावणाहिं मिच्छत्ताभिणिएवेसेहि य
अप्पाणं च परं च तदुभयंचवुग्गाहेमाणा वुप्पाए-
माणा विहरित्ता बहूइं वासाइं सामणणपरियागं
पाउणंति २ कालमासे कालं किच्चा उक्कोसेणं
उवरिमेसु गेवेज्जेसु देवत्ताए उववत्तारो भवन्ति ।
तेहिं तेसिं गई एकतीसं सागरोवमाइं ठिई पर-
लोगस्स अणाराहगा सेसं तं चेव ॥ १९ ॥

से ज्जे इमे गामागर जाव सणिएवेसेसु मणुया
भवन्ति, तं जहा-अप्पारंभा अप्परिग्गहा धम्मिया

धम्माणुया धम्मिद्धा धम्मक्खाई धम्मप्पलोई
धम्मपलज्जणा धम्मसमुदायारा धम्मेणं चेव वित्ति
कप्पेमाणा सुसीला सुव्वया सुप्पडियाणंदा साहू
 एगच्चाओ पाणाइवायाओ पडिविरया जावज्जी-
 वाए, एगच्चाओ अपडिविरया एवं जाव परिग्ग-
 हाओ २ एगच्चाओ कोहाओ माणाओ मायाओ
 लोहाओ पेज्जाओ [दोसाओ] कलहाओ अब्भ-
 क्खाणाओ पेसुण्णाओ परपरिवायाओ अरइरईओ
 मायामोसाओ मिच्छादंसणसल्लाओ पडिविरया
 जावज्जीवाए एगच्चाओ अपडिविरया, एगच्चाओ
 आरंभसमारंभाओ पडिविरया जावज्जीवाए एग-
 च्चाओ अपडिविरया, एगच्चाओ करणकारावणाओ
 पडिविरया जावज्जीवाए एगच्चाओ अपडिविरया,
 एगच्चाओ पयणपयावणाओ पडिविरया जावज्जीवाए
 एगच्चाओ पयणपयावणाओ अपडिविरया, एगच्चाओ
 कोट्टणपिट्ठणतज्जणतालणवह्वंधपरिकिलेसाओ प-
 डिविरया जावज्जीवाए एगच्चाओ अपडिविरया, एग-
 च्चाओ ण्हाणमद्दणवण्णगविलेवणसहफरिसरसरूवगं-
 धमल्लालंकाराओ पडिविरया जावज्जीवाए एगच्चाओ
 अपडिविरया, जे यावण्णे तहप्पगारा सावज्जजोगो-
 वहिया कम्मंता परपाणपरियावणकरो कज्जंति

तओ वि जाव एगच्चाओ पडिविरया जावज्जीवाए
एगच्चाओ अपडिविरया ।

तं जहाः— समणोवासगा भवन्ति, अभिगय-
जीवाजीवा उवलद्धपुण्णवा आसवसंवरनिज्जरकि-
रियाअहिगरणबंधमोक्खकुसला असहेज्जाओदेवा-
सुरणागजक्खरक्खसकिन्नरकिंपूरीसगरुलगंधव्वम-
होरगाइएहिं देवगणेहिं निग्गंथाओ पावयणाओ
अणइक्कमणिज्जा निग्गंथे पावयणे णिस्संकिया णिक्कं-
खिया निव्वितिगिच्छा लद्धट्ठा गहियट्ठा पुच्छियट्ठा
अभिगयट्ठा विणिच्छियट्ठा अट्ठिमिंजपेमाणुरागरत्ता
“अयमाउसो ! निग्गंथे पावयणे अट्ठे अयं परमट्ठे
सेसे अणट्ठे” ऊसियफलिहा अवंगुयदुवारा चियत्तं-
तेउरपरघरदारप्पवेसा चउदसट्ठमुद्धिट्ठपुण्णमासिणी-
सु पडिपुण्णं पोसहं सम्मं अणुपालेमाणा समणे
निग्गंथे फासुएसणिज्जेणं असण्णणखाइमसाइमेणं
वत्थपडिग्गहकंबलपायपुंछणेणं ओसहभेसज्जेणं
पडिहारएण य पीढफलगसेज्जासंथारएणं पडिलाभे-
माणा विहरन्ति २ ता भत्तं पच्चक्खन्ति ते बहूइं
भत्ताइं अणसणाए छेदेति छेदित्ता आलोइयपडिक्कंता
समाहिपत्ता कालमासे कालं किच्चा उक्कोसेणं
अच्चुए कप्पे देवत्ताए उववत्तारो भवन्ति, तेहिं

तेसिं गई बावीसं सागरोवमाइं ठिई आराहया
सेसं तहेव ॥ २० ॥

सेज्जे इमे गामागर जाव सण्णिवेसेसु मणुया
भवन्ति, तं जहाः—अणारंभा अपरिग्गहा धम्मिया
जाव कप्पेमाणा सुसीला सुव्वया सुपडियाणंदा
साहू सव्वाओ पाणाइवायाओ पडिविरया जाव
सव्वाओ परिग्गहाओ पडिविरया सव्वाओ कोहाओ
माणाओ मायाओ लोभाओ जाव मिच्छादंसण-
सल्लाओ पडिविरया सव्वाओ आरंभसमारंभाओ
पडिविरया सव्वाओ करणकारावणाओ पडिविरया
सव्वाओ पयणपयावणाओ पडिविरया सव्वाओ
कुद्धणपिट्ठणतज्जणतालणवहबंधपरिकिलेसाओ पडि-
विरया सव्वाओ ण्हाणमद्दणवण्णगविलेवणसद्दफरि-
सरसरुवगंधमल्लालंकाराओ पडिविरया जैयावणो
तहप्पगारा सावज्जजोगोवहिया कम्मंता परपाण-
परियावणकरा कज्जंति तओ वि पडिविरया
जावज्जीवाए ।

से जहा णामए अणगारा भवन्तिः—इरियास-
मिया भीसासमिया जाव इणमेव निग्गंथं पावयणं
पुरओकाउं विहरंति ।

तेसि एं भगवंताणं एएणं विहारेणं विहरमा-

णाणं अत्येगइयाणं अणंते जाव केवलवरनाणदंसणे समुप्पज्जइ । ते बहूइं वासाइं केवलिपरियागं जाव पाउणंति पाउणि ता भत्तं पच्चक्खंति भत्तं ता बहूइं भत्ताइं अणसणाए छेदेन्ति छेदि ता जस्सट्ठाए कीरइ णग्गभावे जाव अंतं करंति ।

जेसिं पि य णं एगइयाणं णो केवलवरननाण-
दंसणे समुप्पज्जइ ते बहूइं वासाइं छउमत्थपरियागं
पाउणंति पाउणि ता आवाहे उप्पण्णे वा अणुप्पण्णेवा
भत्तं पच्चक्खंति । ते बहूइं भत्ताइं अणसणाए छेदेन्ति
छेदि ता जस्सट्ठाए कीरइ णग्गभावे जाव तमट्ठमारा-
हिता चरिमेहिं ऊसासणीसासेहिं अणंतं अणुत्तरं
निव्वाघायं निरावरणं कसिणं पडिपुणं केवल-
वरनाणदंसणं उप्पाडिंति, तओ पच्छा सिज्झिहंति
जाव अंतं करेहिंति ।

एगच्चा पुण एगे भयंतारो पुव्वकम्मावसेसेणं
कालमासे कालं किच्चा उक्कोसेणं सव्वट्ठसिद्धे महा-
विमाणे देवत्ताए उववत्तारो भवंति, तेहिं तेसिं गई
तेत्तीसं सागरोविमाइं ठिई, आराहगा, सेसं तं
चेव ॥ २१ ॥

सेज्जे इमे गामागर जाव सण्णिवेसेसु मणुया
भवन्ति, तं जहा—सव्वकामविरया सव्वरागविरया

सव्वसंगातीता सव्वसिणेहाइकंता अक्कोहा निक्कोहा
हा एवंखीणक्को माणमायालोहा अणुपुव्वेणं अट्ठ
कम्मपयडीओ खवेत्ता उप्पि लोयग्गपइट्ठाणा
हवन्ति ॥२२॥

(सू० ४२) अणगारे णं भंते भावियप्पा केव-
लिसमुग्घाएणं समोहणित्ता केवलकप्पं लोयं
फुसित्ता णं चिट्ठइ ? हंता चिट्ठइ ।

से णूणं भंते ! केवलकप्पे लोए तेहिं निज्जरापो-
ग्गलेहिं फुडे ? हंता फुडे ॥ १ ॥

छउमत्थे णं भंते ! मणुस्से तेसिं णिज्जरापो-
ग्गलाणं किंचि वरणेणं वण्णं गंधेणं गंधं रसेणं रसं
फासेणं फासं जाणइ पासइ ? गोयमा ! णो इणट्ठे
समट्ठे ॥२॥

से केणट्ठेणं भंते ! एवं बुच्चइ - 'छउमत्थे णं
मणुस्से तेसिं णिज्जरापोग्गलाणं णो किंचि वरणेणं
वरणं जाव जाणइ पासइ ?'

गोयमा ! अयं णं जंबुदीवे दीवे सव्वदीवसमु-
द्धानं सव्वभंतरए सव्वखुट्ठाए वट्ठे तेल्लपूयसंठा-
णसंठिए वट्ठे रहचक्कवाल संठाणसंठिए वट्ठे पुक्ख-
रकणियासंठाण संठिए वट्ठे पडिपुण्णचंदसंठाण-
संठिए एकं जोयणसयसहस्सं आयामविक्खंभेणं

तिणिण जोयणसयसहस्साइं सोलससहस्साइं दोणिण
यसत्तावीसे जोयणसएतिणिण यकोसे अट्ठावीसं च
धणुसयं तेरस य अंगुलाइं अद्दंगुलियं च किंचि
विसेसाहिएपरिक्खे वेणं पणत्ते ।

देवे णं महिड्ढीए महजुतीए महब्बले महाजसे
महासुक्खे महाणुभावे सविलेवणं गंधसमग्गयं
गिरहइ २ त्ता तं अवदालेइ २ त्ता जाव इणामे-
वत्ति कट्ठु केवलकप्पं जंबुद्दीवं दीवं तिहिं अच्छरा-
णिवाएहिं तिसत्तखुत्तो अणुपरियट्ठित्ता णं हव्व-
मागच्छेज्जा ।

से णूणं गोयमा ! से केवलकप्पे जंबुद्दीवे दीवे
तेहिं घाणपोग्गलेहिं फुडे ? हंता फुडे ।

छउमत्थे णं गोयमा ! मणुस्से तेसिं घाणपो-
ग्गलाणं किंचि वण्णेणं वण्णं जाव जाणइ पासइ ?
भगवं ! णो इणट्ठे समट्ठे ।

से तेणट्ठेणं गोयमा ! एवं वुच्चइ—छउमत्थे णं
मणुस्से तेसिं णिज्जरापोग्गलाणं णो किंचि वण्णेणं
वण्णं जाव जाणइ पासइ ।

एसुहुमा णं ते पोग्गला पणत्ता, समणाउसो !
सव्वलोयं पि य एं ते फुसित्ता णं चिट्ठंति ॥३॥

कम्हा णं भंते ! केवली समोहणंति ? कम्हा

णं केवली समुग्घायं गच्छंति ? गोयमा ! केवलीणं
चत्तारि कम्मंसा अपलक्खीणा भवंति, तं जहाः-
(१) वेयणिज्जं (२) आउयं (३) णामं (४)
गोत्तं ।

सव्ववहुए से वेयणिज्जे कम्मे भवइ,
सव्वत्थोवे से आउए कम्मे भवइ, ।
विसमं समं करेइ बंधणेहिं ठिईहि य,
विसमसमकरणयाए वंधणेहिं ठिईहि य ।
एवं खलु केवली समोहणंति एवं खलु केवली
समुग्घायं गच्छंति ॥ ४ ॥

सव्वेवि णं भंते ! केवली समुग्घायं गच्छंति ?
णो इण्डे समट्ठे,
‘अकिरिया णं समुग्घायं, अणंता केवली
जिणा जरामरणविप्पमुक्का, सिद्धिं वरगइं
गया ॥१॥

कइसमए णं भंते ! आउज्जीकरणे पणणत्ते ?
गोयमा ! असंखेज्जसमइए अंतोमुहुत्तिए पणणत्ते
॥ ५ ॥

केवलिसमुग्घाए णं भंते ! कइसमइए पणणत्ते ?
गोयमा ! अट्ठसमइए पणणत्ते । तं जहा—पढमे समए
दंडं करेइ । बिइए समए कवाडं करेइ । तईए समए

मथं करेइ । चउत्थे समए लोयं पूरेइ । पंचमे समए
लोयं पडिसाहरइ । छट्ठे समए मथं पडिसाहरइ ।
सत्तमे समए कवाडं पडिसाहरइ । अट्ठमे समए
दंडं पडिसाहरइ तओ पच्छा सरीरत्थे भवइ ॥६॥

से णं भंते ! तहा समुग्घायं गए किं मणजोगं
जुंजइ ? वेयजोगं जुंजइ ? काययोगं जुंजइ ? गोयमा !
णो मणजोगं जुंजइ, णोवेयजोगं जुंजइ कायजोगं
जुंजइ, कायजोगं जुंजइ ॥७॥

कायजोगं जंजमाणे किं ओरालियसरीरकाय-
जोगं जुंजइ ? ओरालियमिस्ससरीरकायजोगं
जुंजइ ? वेउव्वियसरीरकायजोगं जुंजइ ? वेउव्विय-
मिस्ससरीरकायजोगं जुंजइ ? आहारगसरीरकाय-
जोगं जुंजइ ? आहारगमिस्ससरीरकायजोगं जुंजइ ?
कम्मसरीरकायजोगं जुंजइ ? गोयमा ! ओरालिय-
सरीरकायजोगं जुंजइ, ओरालियमिस्ससरीरकाय-
जोगंपि जुंजइ, णो वेउव्वियसरीरकायजोगं जुंजइ
णो वेउव्वियमिस्ससरीरकायजोगं जुंजइ, णो आहा-
रगसरीरकायजोगं जुंजइ णो आहारगमिस्ससरी-
रकायजोगं जुंजइ कम्मसरीरकायजोगं पि जुंजइ,
पढमट्ठमेसु समएसु ओरालियसरीरकायजोगं जुंजइ
बिइयछट्ठसत्तमेसु समएसु ओरालियमि

स्मसरीरकायजोगं जुञ्जइ तइयचउत्थपंचमेहिं
कम्मसरीरकायजोगं जुंजइ ॥८॥

से णं भंते ! तहा समुग्घायगए सिञ्जइ
बुज्झइ मुच्चइ परिणिब्बाइ सव्वदुक्खाणमंतं
करेइ ? णो इणट्ठे समट्ठे, से णं तओ पडिणियत्तइ,
२ ता इहमागच्छइ, २ ता तओ पच्छा मणजोगं
पि जुंजइ वयजोगं पि जुंजइ कायजोगं पि जुंजइ ।

मणजोगं जुंजवाणेकिं सच्चमणजोगं जुंजइ ?
मोसमणजोगं जुंजइ ? सच्चामोसमणजोगं जुंजइ ?
असच्चामोसमणजोगं जुंजइ ? गोयमा ! सच्चमण-
जोगं जुञ्जइ, णो मोसमणजोगं जुञ्जइ, णो
सच्चामोसमणजोगं जुंजइ असच्चामोसमणजोगं
पि जुंजइ ।

वयजोगं जुंजमाणेकिं सच्चवइजोगं जुंजइ ?
मोसवइजोगं जुंजइ ? सच्चामोसवइजोगं जुंजइ ?
असच्चामोसवइजोगं जुंजइ ? गोयमा, सच्चवइजोगं
जुंजइ, णो मोसवइजोगं जुंजइ, णो सच्चामोसवइ-
जोगं जुंजइ असच्चामोसवइजोगं पि जुंजइ ।

कायजोगं जुंजमाणे आगच्छेज्ज वा चिट्ठेज वा
णिसीएज्ज वा तुयट्ठेज वा उल्लंघेज्ज वा पल्लंघेज्ज
वा उक्खेवणं वा पक्खेवणं वा तिरियक्खेवणं वा

करेज्जा पाडिहारियं वा पीढफलगसेज्जासंथारगं
पच्चप्पिणेज्जा ।

(सू० ४३) से णं भंते ! तहासजोगी सिज्भइ
जाव अंतं करेइ ? णो इण्ठे समठे ।

से णं पुव्वामेव संणिस्स पंचिंदियस्स पज्ज-
त्तगस्स जहणजोगस्स हेठ्ठा असंखेज्जगुणपरि-
हीणं पढमं मणजोगं निरुंभइ, तथाणंतरं च णं
बिंदियस्स पज्जत्तगस्स जहणजोगस्स हेठ्ठा
असंखेज्जगुणपरिहीणं विइयं बइजोगं निरुंभइ,
तथाणंतरं च सुहुमस्स पणगजीवस्स अपज्जत्त-
गस्स जहणजोगस्स हेठ्ठा असंखेज्जगुणपरिहीणं
तइयं कायजोगं णिरुंभइ ।

से णं एएणं [पउत्तेणं] उवाएणं पढमं मणजोगं
णिरुंभइ २ त्ता वयजोगं णिरुंभइ २ त्ता कायजोगं-
निरुंभइ कायजोगं निरुंभइत्ता जोगनिरोहं
करेइ, २ त्ता अजोगत्तं पाउणई, २ त्ता ईसिंहस्स-
पंचक्खरुच्चारणद्धाए असंखेज्जसमईयं अंतोमुहु-
त्तियं सेलेसिं पडिवज्जई, पुव्वरइयगुणसेढीयं च
णं कम्मं तीसे सेलेसिमद्धाए असंखेज्जाहिं गुणसे-
ढीहिं अणंते कम्मंसे खवेति वेयणिज्जाउयणाम-
गोए ईच्चेते चत्तारि कम्मं से जुगवं खवेई, २ त्ता

ओरालियतेयकम्माइं सव्वाहिं विप्पजहणाहिं विप्प-
जहइ, २ ता उज्जूसैदीपडिवण्णे अफुसमाणगई
उड्ढं एकसमएणं अविग्गहेणं [उड्ढ] गंता सागा-
रोवउत्ते सिज्झई ।

ते णं तत्थ सिद्धा भवन्ति सादीया अपज्जवसिया
असरीरा जीवघणा दंसणनानोवउत्ता निट्ठियट्ठा
निरेयणा नीरया णिम्मलवितिमिरा विमुद्धा सास-
यमणागयद्धं कालं चिट्ठंति ।

से केणट्ठेणं भन्ते ! एवं वुच्चई 'ते णं तत्थ
सिद्धा भवन्ति सादीया अपज्जवसिया जाव चिट्ठंति'?
गोयमा ! से जहा णामए बीयाणं अग्गिदड्ढाणं
पुणरवि अंकुरुप्पत्ती ण भवइ, एवामेव सिद्धाणं
कम्मबीए दड्ढे पुणरवि जम्मुप्पत्ती ण भवई । से
तेणट्ठेणं गोयमा ! एवं वुच्चई-ते णं तत्थ सिद्धा
भवन्ति सादीया अपज्जवसिया जाव चिट्ठंति ।

जीवा णं भन्ते ! सिज्झमाणा कयरं मिसंघयणे
सिज्झन्ति ? गोयमा ! वइरोसभणारायसंघयणे
सिज्झन्ति ।

जीवा णं भन्ते ! सिज्झमाणा कयरंमि संठाणे
सिज्झन्ति ? गोयमा ! छण्हं संठाणाणं अण्णयर
संठाणे सिज्झन्ति ।

जीवा णं भंते ! सिज्झमाणा कयरम्मि उच्चत्ते
सिज्झंति ? गोयमा ! जहण्णेणं सत्तरयणीए उक्को-
सेणं पंचघणुसइए सिज्झंति ।

जीवा णं भंते ! सिज्झमाणा कयरम्मि आउए
सिज्झंति ? गोयमा ! जहण्णेणं साइरेगट्ठवासाउए
उक्कोसेणं पुव्वकोडियाउए सिज्झंति ।

अत्थि णं भंते ! इमीसे रयणप्पहाए पुढवीए
अहे सिद्धा परिवसंति ? णो इण्ठे समट्ठे, एवं जाव
अहे सत्तमाए ।

अत्थि णं भंते ! सोहम्मस्स कप्पस्म अहे सिद्धा
परिवसंति ?—णो इण्ठे समट्ठे, एवं सव्वेसिं पुच्छा,
ईसाणस्स सणंकुमारस्स जाव अच्चुयस्स गेवेज्जवि-
माणाणं अणुत्तरविमाणाणं ।

अत्थि णं भंते ! ईसोपब्भाराए पुढवीए अहे
सिद्धा परिवसंति ?, णो इण्ठे समट्ठे ।

से कहिं खाइ णं भंते ! सिद्धा परिवसंति ?
गोयमा ! इमीसे रयणप्पहाए पुणवीए बहुसमर
मणिज्जाओ भूमिभागाओ उड्ढं चंदिमसूरियग्गह-
गणणक्खत्तताराभवणाओ बहूइं जोयणाइ, बहूइं
जोयणसयाइं बहूइं जोयणसहस्साइं बहूइं जोयण-
सयसहस्साइं बहूओ जोयणकोडीओ बहूओ जोय-

णकोडाकोडीओ उड्ढतरं उप्पइत्ता सोहम्मीसाण
 सणकुमारमाहिंदबंभलंतगमहासुक्कसहस्सारआण-
 यपाणयआरणच्चुय तिणिण य अट्टारे गेविज्जविमा-
 णावाससए वोईइत्ता विजयवेजयंतजयंतअपराजि-
 यसव्वठ्ठसिद्धस्स य महाविमाणस्स सव्वउवरि-
 ल्लाओ थूभियग्गाओ दुवालसजोयणाइं अवाहाए
 एत्थ णं ईसीपम्भारा णाम पुढवी पणत्ता पणया-
 लीसं जोयणसयसहस्साइं आयामविकखंभेणं एगा
 जोयणकोडी बायालीसं [च] सयसहस्साइं तीसं
 च महस्साइं दोणिण य अउणापण्णे जोयणसए
 किंचि विसेसाहिए परिरएणं ।

ईसीपम्भाराए णं पुढवीए बहुमज्झदेसभाए
 अट्टजोयणिए खेत्ते अट्ट जोयणाइं बाहल्लेणं, तयाणं-
 तरं च णं मायाए २ परिहायमाणो २ सव्वेसु चरि-
 मपेरंतसु मच्छियपत्ताओ तणुयतरा अंगुलस्स
 असंखेज्जइभागं बाहल्लेणं पणत्ता ।

ईसीपम्भाराए णं पुढवीए दुवालस णामधेज्जा
 पणत्ता, तं जहा—ईसी इ वा ईसीपम्भारा इ वा
 तणू इ वा तणुतणू इ वा सिद्धी इ वा सिद्धालय इ
 वा मुत्ति इ वा मुत्ताले इ वा लोयग्गे इ वा

लोयग्गथूभिला इ वा लोयग्गपडिवुज्झणा इ वा
सव्वपाणभूयजोवसत्तसुहावहा इ वा ।

ईसीपब्भारा णं पुढवी सेया संखतलविमल-
सोल्लियमुणालदगरयतुसारगोकखीरहारवण्णा उत्ता-
णयद्धत्तसंठाणसंठिया सव्वज्जुणसुवण्णयमाई
अच्छासण्हा लण्हा घट्ठा मट्ठा णीरयाणिम्मला
णिप्पंका णिक्कंढच्छाया समरीचिया सुप्पभा पासा-
दीवा दरिसणिज्जा अभिरूवा पडिरूवा ।

ईसीपब्भाराए णं पुढवीए सीयाए जोयणंमि
लोगंते । तस्स जोयणस्स जे से उवरिल्ले गाउए
तस्स णं गाउयत्तस्स जे से उवरिल्ले छब्भागे तत्थ
णं सिद्धा भगवंतो सादिया अपज्जवसिया अणेग-
जाइजरामरणजोणिवेयणं संसारकलंकलीभावपु-
णब्भवगब्भवासवसहीपवंचं अइक्कंता सासयमणा-
गयद्धं चिट्ठंति ।

कहिं पडिहया सिद्धा ? कहिं सिद्धा पइठ्ठिया ? ।

कहिं बोदिं चइत्ता णं, कत्थ गंतूण सिज्झई ॥ १ ॥

अलोगे पडिहया सिद्धा, लोयग्गे य पडिट्ठिया ।

इहबोदिं चइत्ता णं, तत्थ गंतूण सिज्झई ? ॥ २ ॥


जं संठाणं तु इहं भवं चयं तस्स चरिमसमयंमि ।

आसी य पएसघणं तं संठाणं तहिं तस्स ॥ ३ ॥

दीहं वा हस्सं वा जं चरिमभवे हवेज्ज संठाणं ।
 तत्तो तिभागहीणं सिद्धाणोगाहणा भणिया ॥ ४ ॥
 तिण्णि सया तेत्तीसा धणुत्तिभागो य होइ वोद्धव्वा ।
 एसा खलु सिद्धाणं उक्कोसोगाहणा भणिया ॥ ५ ॥
 चत्तारि य रयणीओ रयणिति भागूणिया य वोद्धव्वा ।
 एसा खलु सिद्धाणं मज्झिमओगाहणा भणिया ॥ ६ ॥
 एक्का य होइ रयणी साहीवा अंगुलाइ अट्ठ भवे ।
 एसा खलु सिद्धाण जहण्णओगाहणा भणिया ॥ ७ ॥
 ओगाहणाए सिद्धा भवत्तिभागेण होइ परिहीणा ।
 संठाणमणित्थं जरामरणविप्पमुक्काणं ॥ ८ ॥
 जत्थ य एगोसिद्धो तत्थ अणंता भवक्खयविमुक्का ।
 अण्णोण्णसमोगाढा पुट्ठा सव्वे य लोगंते ॥ ९ ॥
 फुसइ अणंते सिद्धे सव्वपएसेहि णियमसा सिद्धो ।
 तं वि असंखेज्जगुणा देसपएसेहिं जे पुट्ठा ॥ १० ॥
 असरीरा जीवघणा उवउत्ता दंसणे य णाणे य ।
 सागारमणागारं लक्खणमेयं तु सिद्धाणं ॥ ११ ॥
 केवलणाणुवउत्ता जाणंहि सव्वभावगुणभावे ।
 पासंति सव्वओ खलु केवलदिट्ठीअणंताहिं ॥ १२ ॥
 णवि अत्थि माणुसाणं तं सोक्खं णविय सव्वदेवाणं ।
 जं सिद्धाणं सोक्खं अव्वावाहं उवगयाणं ॥ १३ ॥

जं देवाणं सोक्खं सव्वद्धापिंडियं अणंतगुणं ।
 ण य पावइ मुत्तिसुहं णंताहिं वग्गवग्गूहि ॥ १४ ॥
 सिद्धस्स सुहो रासो सव्वद्धापिंडिओ जइ हवेज्जा ।
 सोणंतवग्गभइओ सव्वागासे ण माएज्जा ॥ १५ ॥
 जह णाम कोइ मिच्छो णगरगुणे बहुविहेवियाणंतो ।
 ण चएइ परिकहेउं उवमाए तहिं असंतीए ॥ १६ ॥
 इय सिद्धाणं सोक्खं अणोवमं णत्थि तस्स ओवम्मं ।
 किंचि विसेसेणेत्तो ओवम्ममिणं सुणह वोच्छं ॥ १७ ॥
 जह सव्वकामगुणियं पुरिसो भोत्तूण भोयणं कोई ।
 तण्हाळुहाविमुको अच्छेज्ज जहा अमियतित्तो ॥ १८ ॥
 इय सव्वकालतित्ता अतुलं निव्वाणमुवगया सिद्धा ।
 सासयमव्वाबाहं चिट्ठंति सुही सुहं पत्ता ॥ १९ ॥
 सिद्धत्ति य कुद्धत्ति य पारगयत्ति य परंपरगयत्ति ।
 उम्मुक्ककम्मकवया अजरा अमरा असंगा य ॥ २० ॥
 णिच्छिण्णसव्वदुक्खा जाइजरामरणबंधणविमुक्का ।
 अव्वाबाहं सुक्खं अणुहोती सासयं सिद्धा ॥ २१ ॥
 अतुलसुहसागरगया अव्वाबाहं अणोवमं पत्ता ।
 सव्वमणागयमद्धं चिट्ठंति सुहो सुहं पत्ता ॥ २२ ॥

✽ उववाइ उवंगं समत्तां ✽



भं भवतु ।

जीवन कार्यालय अजमेर के स्थाई ग्राहक और पत्र व्यवहार के नियम

- (१) स्थाई ग्राहक बनने की प्रवेश- फीस एक रुपया ।
 - (२) “ माला ” की पुस्तकें प्रकाशित होने पर १५ दिन पहले मूल्य आदि का “सूचना-पत्र” भेज देने के बाद ग्राहकों को २५) सैकड़ा कमीशन काट कर वी० पी० भेजी जाती है ।
 - (३) एक रुपया से कम की वी० पी० नहीं भेजी जायगी ।
 - (४) आर्डर भेजते समय स्पष्ट लिखना चाहिए कि पुस्तकें रेल से या डाक से किस प्रकार भेजी जाँय ।
 - (५) पुस्तकें मंगाकर वापस करने पर लुकसान तथा डाक महसूल कुल खर्च मंगाने वाले से वसूल किया जावेगा, अतः आर्डर देने से पूर्व बहुत सोच समझ कर पुस्तकें मङ्गानी चाहियें ।
 - (६) बैरङ्ग पत्र नहीं लिये जावेंगे और न पत्र के साथ भेजे हुए टिकटों की कोई जिम्मेदारी कार्यालय पर होगी ।
 - (७) आर्डर भेजते समय मुकाम, डाकखाना तथा जिला व रेलवे स्टेशन बहुत साफ, व स्पष्ट लिखना चाहिये ।
 - (८) यदि किसी वी० पी० में भूल जान पड़े तो उसे लौटाना नहीं चाहिये, वी० पी० छुड़ाकर हमें तुरन्त लिखें, भूल ठीक कर देंगे ।
- नोट—हिन्दी की प्रायः सभी प्रसिद्ध २ प्रकाशकों की पुस्तकें उचित मूल्य पर जीवन कार्यालय अजमेर में सदैव मिल सकेंगी ।

पत्र व्यवहार का पता

पंडित छोटेलाल यति

जीवन कार्यालय (तारघर के पीछे) अजमेर

जैन धर्म में क्रान्ति फैलाने वाले ग्रन्थ



दयादान प्रचारक पुस्तकें ।	इन पर कमीशन नहीं मिलेगा ।
१ अनुकम्पा विचार	1) २१ अस्तेय व्रत =)
२ परदेशी राजा	1) २२ सत्यव्रत =)
३ आदर्श क्षमा	-) ॥ २३ सुबाहु कुमार 1)
४ अर्जुन माली [राधेश्याम तर्जमें] =)	२४ अहिंसा व्रत 1)
५ नंदन मणीहार	) ॥ २५ वैधव्य दीक्षा -)
६ प्रार्थना	-) २६ ब्रह्मचर्यव्रत =)
७ सुदर्शन	-) २७ धर्म व्याख्या =)
८ मदनरेखा	-) २८ सनाय-अनाथ निर्णय =)
९ चूलणी पिता	-) २९ सरुडाल पुत्र की कथा =)
१० जैनधर्म में मातृ पितृ सेवा -)	३० तीर्थंकर चरित्र प्र० भा० 1)
११ परिचय [दयादान विचार] =)	३१ ,, द्वि० भा० 1=)
१२ शालीभद्र चरित्र ३ भाग 1=)	३२ सत्यमूर्ति हरिश्चन्द्रतारा 1)
१३ मिलके वस्त्र और जैन धर्म -)	३३ रुक्मणी विवाह 1)
१४ जिनरिख जिनपाल	) ॥ ३४ खादी और जैनधर्म -)
१५ मेघकुमार	1-) ३५ स्मृति श्लोक 1-)
१६ सामाहिक और धर्मोपकरण -)	३६ जैनधर्मशिक्षावली भा० ७ व 1=)
१७ नमिराज ऋषि भेंट	३७ सती राजमती =)
१८ तेरापंथसे सुजानगढ़ में चरचा) ॥	३८ परिग्रह व्रत (छपेगा)
१९ सद्धर्म मण्डन १ ॥)	३९ साधारण पाठ्य पुस्तक =)
२० चित्रमय अनुकम्पा विचार १ ॥)	४० नंदीसूत्र मूल पाठ ७)

पत्र व्यवहार का पता—

पं० छोटेलाल यति रांगड़ी चौक, बीकानेर